

Kristo da Gen Pasili Jon do Panalon An Ingut

But piso gen

On papia Jon da mandagit. Unun Jon dagin Gen Bin Tagisi gat ae 1 Jon, 2 Jon, ae 3 Jon kisi mandagit.

On papia unun amin da Yesu yolyol amin madepsi panupbal awit bisapmon Jon da mandagit. Yo yokwisi an yomgwit, nido Yesu yolyol amin unun Yesu Kristo do Amin Taginin yansi nandan gadan ingwit. On papia da Yesu yolyol amin dakon nandan gadatni panteban anakwan jigi madep unun da dima pabin yopjak yan do yosok.

On papia da yo don noman tokdan unun do tilak gen morapmi yosok. Yesu yolyol amin unun bisapmon egipgwit unun da tilak gen nandan pisawit, mani nandan gadatni mini amin dima nandawit. Tilak gen unun dakon mibili unun yan: Yesu Kristo unun Amin Tagi, ae unun da kisiron da Pin kop da uwalni kisi morap pabin yopdisak, anek Sunduk yo kisi abin yipdisak. Anek Yesu pini an mudosak bisapmon Pin kop da minat aminyo tebaisi agek nandan gadatni dima yipman dekwit amin do tomni yomdisak. Anakwan Pin kop gat egek ae sanbenek jigi dima pakdan, nido Pin kop da yo morap aeni pan kaluk an mudokdisak.

*Yesu Kristo da panmuwukbi 7 kabi do gen yipgut
(Kilapmi 1-3)*

¹ Gen on pasili tawit, ban Yesu Kristo da panjalon agit. Yesu da oman monjini yolisak do Pinjop da ingut. Yo unun tepmisi altokdan. Yesu da aneloni yabekban abin pi monjini nak Jonon gen on nayigit. Nak da pi monjini diwari yoliken yanon da nayigit.

² Yo morap noligit unun bamisi pindakim. Pinjop dakon gen ae Yesu Kristo dakon gen unun bamisi.

³ Pinjop yo morap noman toni do yagit unun dakon bisap kwan tosok, do amin kinda da on kombi gen panmuwukbi do manjin yomjak kan, unun kisik kisik tagi asak. Ae gen on mandabi unun nandanek guramitni amin, ununyo kisi kisik kisik ani.

Jon da panmuwukbi 7 kabi do gen mandagit

⁴ Nak Jon da panmuwukbi 7 kabi Esia Provinskon ekwan ji do gen on mandisat. Pinjop abisok egisak, ae kalipsigwan egipgut, ae don egipdisak unun da nandan yawok damanakwan butji yawori tosak. Ae wup 7 kabi Pinjop dakon kila amin madep yityit tamo da inamon ekwan ununyo kisi da nandan yawok damanakwan butji yawori tosak.

⁵ Yesu Kristo, Pinjop dakon gen bamisi yan tenjenok amin, unun kimoron da mibiltan pidagit. Ae unun kila amin madep morap miktimon ekwan unun dakon Amin Tagini. Unun kisi da but yawot nandan damanakwan butji yawori tosak.

Yesu da nin but dasi galak tan nimisak, ae iyi dakon yawi da yokwinin wiririk mudagit.

⁶ Yan anek nin unun gat amin kila anej do manjin nipgut, ae iyi dakon Pinjkop ae Datni unun dakon oman anej do mukwa sogok amini egipneñ do manjin nipgut. Bisap mudok mudogi mini Yesu Kristo dakon tilimni ae tapmim madepni tan imdisak. Unun asi.

⁷ Koni. Unun gikwem gat kisi apdisak. Abinjakwan amin morap kisi da dabil da kokdan. Amin morap Yesu sugawit unun kisi da kokdan. Anakwa amin morap miktimon ekwan kisi da unun do nandanek kunam bupmiyo madepsi akdan. Asi, yo morap unun altan mudokdan. Unun asi.

⁸ Amin Tagi Pinjkop Tapmim Ami, abisok egisak, ae kalipsigwan egipgut, ae don apdisak, unun da yan yosok, “Nak Wasok Wasoksi ae Mibisi egisat.”

Jon da Kristo kagit

⁹ Nak Jon, ji dakon notji. Nin Yesu dakon amin kabi, ae Pinjkop da Amin Kila Asak unun da kagagwan kalonji ekwaman, do but yaworon da jigi ae tepmiyo kalonji paman. Panek kisin da dima alek tanek tebai akgaman. Nak Pinjkop dakon gen yan tetenjanek, “Nak Yesu nandan gadan imisat” yan yagim, do anek nak abidan tap binap miktim tim Patmos unudon nepgwit da egisat.

¹⁰ Amin Tagi dakon gildatni Sondakon, Telagi Wup da butnokon pigi madepsi tugagit. Anakwan manjinokon nandanapbo amin kinda gen madepsi yan tidanek kwen da yan yagit.

¹¹ Unun amin da yan yagit, “Yo morap pindakdal unun papiakon mandan yopbi panmuwukbi 7 kabi

do kini. Mandan yopbi panmuwukbi Epesas kokup papmon ekwan, ae Smena, ae Pegamum, ae Taitaira, ae Sadis, ae Piladelpia ae Laodisia do kini.”

¹² Yanban nak gen nayigit amin unun kok do tobigim. Tobilek tenjeni tamo gol ban wasanbi 7 kabi pindagim.

¹³ Unun da binapmon
 “amin dakon monji yombem kinda”
 akban kagim. Unun imal dubakni paban pigi kandapni kisi witjigit. Anjek nap kinda gol ban wasanbi nan pibirikon angwasinjek wamgut.

¹⁴ Busunji ae busun dangwani unun kwakwagisi, sipsip dakon dangwan ae gik sitnan yombem. Ae dabilni kindap tebaisi soson unun yombem.

¹⁵ Kandapni unun tenjenisi ain kinda mani bras kindapmon soson unun yombem. Ae tekni nandagim unun pakbi madepsi pokgon unun dakon wiwik yombem.

¹⁶ Kisiri amin tet da gik 7 kabi timikgit. Ae emat agak siba geni teri teri ae geni tepmisi unun gen kaganigwan da pawin tagit. Gildat da tebaisi wisisak unuden tomno dabilni madepsi tenjenagit.

¹⁷ Nak unun kanjek kandapnikon man pagek amin kimakbi da yan pakgim. Pagapbo kisitni amin tet da kwenokon witjinjek yan yagit, “Dima pasolgi. Nak Wasok Wasoksi ae Mibisi egisat.

¹⁸ Nak Egip Egip Egisat Amin. Nak kimakgim, mani koki, nak egip egip dagok dagogi mini egi anan kisat. Kimot dakon yoma wital, ae amin kili

1:13: Dan 7.13; 10.5 **1:14:** Esi 43.2; Dan 7.9; 10.6; PA 2.18; 19.12

1:16: Ibr 4.12; PA 2.12; 19.15 **1:17:** Ais 44.6; 48.12; PA 2.8; 22.13

kimakgwit unun dakon kokup dakon yoma witdal kisitnokon tonj.

¹⁹ Do gak yo pindakdal unun dakon geni mandaki. Yo abisok tonj, ae yo don noman tokdanj, unun do mandaki.

²⁰ Gik 7 kabi kisitno amin tet do tanja pindal, ae tenjenj tamo gol banj wasanji 7 kabi yanj pindal, unun dakon mibili pasili tosok. Mibili unun yanj: gik 7 kabi unun panmuwukbi 7 kabi dakon anjeloni. Anakwa tenjenj tamo 7 kabi unun panmuwukbi 7 kabi.”

2

Epesas panmuwukbi do gen yipgut

¹ Unun da sanbenjek yanj yagit, “Gak panmuwukbi Epesas kokup papmon ekwanj unun dakon anjeloni do gen yanj mandaki:

Nak gik 7 kabi kisitno amin tet da timigek tenjenj tamo gol banj wasanji 7 kabi da binapmon agisat. Agek gen on yipbo gagon obisak.

² Anpak asal ae pi teban asal unun kili nandan mudagim. Gak tebaisi agek amin anpakni yokwi do dima galak tanj yomisal. Diwari da yanj gayiwit, ‘Ninyo kisi yabekbi’, mani unun yabekbi dima yanj unun gaga kili geni kokwinigek top amin yanj pindakgil.

³ Amin da gandaba mano abidosol do yo yokwisi anjamanj. Mani tebaisi agek jigi unun imegek kuraktok dima asal.

⁴ Mani nak gak gat gen tonj. Nandanj gadat kaluk agil bisapmon nak do but dasi galak tanj namgul, mani abisok yanj dima asal.

⁵ Kalip tagisi egipgul do nandaki. Gak kili mal. Do anpak kalip agil unun do aego nandanek but tobil anek anpak kalip agil unuden abi. Yan dima abi kan, abin lamgo unun si gwayeken.

⁶ Mani anpakgo tagisi kinda unun yan: Nikolas dakon amin kabi dakon anpak do nandaba yokwi tok asal. Nagayo kisi unun amin dakon anpak do nandako yokwi tosok.

⁷ Amin mirakni ton da Telagi Wup da panmuwukbi do gen yosok unun pakyanji nandani. Amin kinda emaron teban tosak kan, nak da yan dagan iminapbo egip egip kindap walon jap pan nosak. Kindap unun Paradais kon Pin kop da pigaga tosok.”

Smena panmuwukbi do gen yipgut

⁸ Unun da sanbenek yan yagit, “Gak panmuwukbi Smena ekwan unun dakon aneloni do gen yan mandaki:

Nak wasok wasoksi ae mibisi egisat. Nak kimakgin da aeno kalugi egisat. Gen on yipbo gagon obisak.

⁹ Gagon jigi ae tepmiyo morapmi noman tan gaman, ae yogo minisi da egisal, unun nandan gamisat. Mani yogo morapmisi. Amin diwari da gen yokwi yan gaman unun nandisat. Unun amin da iyi do nin Juda amin yan yon, mani unun Juda amin dima, unun Sunduk dakon amin kabi.

¹⁰ Donjok tepmi pakdisal. Mani unun do pasol pasol dima abi. Ji pankewal do Sunduk da ji da bi- napmon amin diwari ban dam tebanon yopdisak.

Yaŋ aban jigi ae tepmiyo gildat 10 da aripmon pakdaŋ. Dikba kimotni do yoni kaŋ, tebaisi agek nandan gadatji dima wiɗdal kisak. Anakwa egip egip dakon pelit tilimi toŋ dabeŋ.

¹¹ Amin mirakni toŋ da Telagi Wup da paŋmuwukbi do gen yosok uŋun pakyaŋsi nandani. Amin kinda emaron teban tosak kaŋ, uŋun amin kimot da ae kinda gat aripmi dima anɗbal asak.”

Pegamum paŋmuwukbi do gen yipgut

¹² Uŋun da gen saŋbeŋek yagit, “Gak paŋmuwukbi Pegamum kokup papmon ekwaŋ uŋun dakon aŋeloni do gen yaŋ mandaki:

Nak emat agak siba geni teri teri ae geni tepmisi uŋun abidosot. Gen on yipbo gagon obisak.

¹³ Kokup egisal uŋudon Sunduk dakon kila amin madep yityit tamoni uŋudon tosoƙ uŋun nandisat. Mani nak dakon man abidaŋ kimokdol. Antipas, nak dakon gen dakon yaŋ tenɗenɗok amin tagisi kinda, uŋun Sunduk da egisak kokupmon anakba kimakgit. Yaŋ anakwa gak uŋun bisapmon nak do wasip dima yagil.

¹⁴ Mani nak gak gat gen toŋ. Gagon amin di da Balam dakon anɗpak abidaŋ kimokgoŋ. Balam dakon anɗpak uŋun yaŋ. Kalip Balam da Balak Israel amin paŋkewal dakon mibili iyin dekgit. Iyin dekban Balak da Israel amin paŋkewalban yokwi anek kokup kidat do bit kilapyo mukwa sowit uŋun nawit. Ae yumabi kisi awit.

¹⁵ Uŋuden gɨn amin di gagon ekwaŋ uŋun Nikolas dakon amin kabi dakon geni guramikgaŋ.

¹⁶ Gak but tobil abi. Yanj dima abi kañ, nak kili unjok gagon obijek gen kaganokon emat agak siba tosoq unjun nañ unjun aminon emat akdisat.

¹⁷ Amin mirakni toñ da Telagi Wup da pañmuwukbi do gen yosok unjun pakyañsi nandani. Amin kinda emaron teban tosak kañ, nak da mana di abisok pasili toñ unjun ibeñ. Ae tip kwakwagi kinda ibeñ. Unjun tipmon man kalugi kinda mandabi da tosak. Unjun man amin kinda da dima nandisak. Amin tip abidosak unjun amin dagin nandakdisak.”

Taitaira pañmuwukbi do gen yipgut

¹⁸ Unjun da gen sañbeñek yagit, “Gak pañmuwukbi Taitaira kokup papmon ekwan unjun dakon anjelo do gen yan mandaki:

Nak Piñkop dakon Monji. Dabilno unjun kindap tepmisi sosok unjun yombem, ae kandapno tenjenosok unjun ain kinda mani bras suganba kwakwagisi an unjun yombem. Gen on yipbo gagon obisak.

¹⁹ Anpak morap asal unjun nandan mudosot. Gak amin do but dasi galak tan yomisal, ae nak nandan gadan namisal, ae amin diwari pañpulugok do pi asal. Nak nandisat, pi mibiltok agil unjun yapmanek abisok pi madepsi asal.

²⁰ Mani nak gak gat gen toñ. Gak Jesebel yipbi gak gat ekwamal. Minjat unjun da nak kombi amin kinda yan yosok, mani pi monjino top pañkewalek yumabi anpak, ae jap kokup kidat do paret abi unjun noni do yoyin dekdak.

21 But tobil asak do nandanek bikbik imisat. Mani but tobil anek yumabi anpakni yipman det do dima nandisak.

22 Do unun minat sot kinda ibo tepmi madepsi pakdisak. Ae amin morap unun minat gat yumabi awit but tobil anek unun minat dakon anpakni dima yipman mudoni kan, ununyo kisi jigi ae tepmiyo madepsi yomdisat.

23 Ae monji gwayoni kisi dapbo kimotni. Yan anapbo panmuwukbi kisi morap da nak da amin but ae nandak nandakyo pindagek ji kalon kalon anpak ani da aripmon tomni damdisat yan nandan namdan.

24 Mani panmuwukbi diwari Taitaira ekwan ji minat unun dakon gen dima yolgan, ae 'Sunduk dakon geni pasili' yan yon, unun dakon mibili nandak do pini dima awit. Yan dayisat, jigi kinda gat dima daben.

25 Mani yo morap timikgan unun tebaisi timigakwa wigi nak da opben dakon bisap asak.

26 Emaron teban tajak geno guramigakwan wigi bisap madep apjak amin unun yan mudan ibo miktim morap kila akdisak.

27 'Kila amin pini tapmimi tonji anek ain win kirin nan uwalni pudan monin monin akdisak, amin da miktim kwoba pudan monin monin an unun da tilagon akdisak.'

Datno da yan mudan namgut, unun da tilak unun amin do yan mudan iben.

28 Ae wisawisa do gik wisak unun kisi iben.

29 Amin mirakni tonj da Telagi Wup da panjmuwukbi do gen yosok unun pakyanji nandani.”

3

Sadis panjmuwukbi do gen yipgut

¹ Unun da sanjenek yan yagit, “Gak panjmuwukbi Sadis kokup papmon ekwan unun dakon aneloni do gen yan mandaki:

Nak Pinjop dakon wup 7 kabi timikdat, ae gik 7 kabi kisi timikdat. Gen on yipbo gagon obisak. Anpak morap asal unun kisi nandan mudosot. Amin da gak do yan yon, ‘Sadis panjmuwukbi kabi unun egip egipmi tonji. Mani kili kimakgil.

² Dipmingo yopbi kit! Anpakgo diwari dima kimakgwit unun panjeban abi. Nido anpakgo kinda Pinjopno da dabilon kilegisi yan kinda dimasi kat.

³ Gen bami kalip nandanek abidagil, unun do aego nandabi. Nandanek guramigek but tobil abi. Dipmin dima yipbi kisak kan, kabo noknok da tilagon apdisat. Abinapbo gagon opdisat dakon bisap dima nandakdisal.

⁴ Mani amin kabisok kinda Sadis ekwan unun imalni dakon kila anek garak dima awit. Unun amin kabi dakon anpakni kilegisi, do imal kwakwagi paba nak gat tagi agipnenj.

⁵ Amin kinda emaron teban tosak kan, unun do kisi imal kwakwagi panj ibenj. Ae egip egip piakon mani dima wiririkgenj. Datno da inamon ae aneloni da inamon mani yan tenjenokenj.

⁶ Amin mirakni tonj da Telagi Wup da panjmuwukbi do gen yosok unun pakyanji nandani.”

Piladelpia panjmuwukbi do gen yipgut

⁷ Unun da sanbenek yan yagit, “Gak panjmuwukbi Piladelpia kokup papmon ekwan dakon aneloni do gen yan mandaki:

Nak telagisi, ae anpak bamisi dakon ami. Nak da Dewit dakon yoma wital abidosot. Nak da yoma witaldat, amin kinda da aripmi dima sop sopmi. Ae nak da yoma sopmandat, amin kinda da aripmi dima witali. Gen on yipbo gagon obisak.

⁸ Anpak morap asal unun kili nandan mudagim. Koki! Injamgonk yoma kinda witalbo pisosok. Ae amin kinda da aripmi dima sopjak. Nak nandisat, tapmingo madep dima, mani nak dakon gen guramigek nak dakon man do wasip dima yagil.

⁹ Sunduk dakon amin kabi unun da iyi do nin Juda amin yan yon, mani unun Pinjkop dakon amin dima, unun top amin. Nak da unun amin yabekgo abin gak da kandap mibilon njwakben anek nak da ji but dasi galak tan damisat yanji nandani.

¹⁰ Nak dakon gen guramigek jigi altan gang-wit bisapmon butgo yawori tanakwan tebaisi akgil. Yan agil do jigi madep miktimi miktimi amin panjkewal do noman tokdisak bisapmon kilago anapbo jigi unun dima altan gamjak.

¹¹ Gagon tepmisi apdisat. Yo abidosol unun tebaisi abidoki. Amin kinda da tomnigo unun di gwayenban.

¹² Amin kinda emaron teban tosak kan, nak da gwak yan moko agek Pinjopno dakon telagi yut anteban asak. Anek Pinjop dakon yut yipmanek aeni wanja dima pigisak. Unun aminon Pinjopno dakon man, ae Pinjopno dakon kokup pap dakon man mandaken. Kokup pap unun Jerusalem kalugi, unun Kwen Kokup yipmanek Pinjopnokon da pikdisak. Ae naga dakon mano kalugi kisi unun aminon mandakdisat.

¹³ Amin mirakni ton da Telagi Wup da panmuwukbi do gen yosok unun pakyanji nandani.”

Laodisia panmuwukbi do gen yipgut

¹⁴ Unun da sanbenek yan yagit, “Gak panmuwukbi Laodisia kokup papmon ekwan unun dakon aneloni do gen yan mandaki:

Nak Pinjop dakon geni gat ae yan teban tok geni gat do gen unun asisi yan yogok amin. Nak Pinjop dakon gen bamisi yan tenjenok amin. Bisapmi bisapmi geni bamisi gin yan tenenosot. Pinjop da yo morap wasagit dakon mibilisi nak da gen on yipbo gagon obisak.

¹⁵ Anpak morap asal unun kisi nandan mudosot. Nak nandisat, gak mirimi dima, ae tedepmi dima. Gak da mirimi bo ae tedepmi egipbi do nandisat.

16 Mani dima. Gak tedepmi yangok egisal. Gak tedepmisi dima ae mirimisi yo dima. Yanj do anjek gen kaganokon da gak wanditdisat.

17 Gak 'Moneŋno morapmi ae yo kabino morapmi toŋ. Yo kinda do wadak wadak dima asat' yanj yosol. Mani dima. Amin da bupmisi nandan gamni da tilagon yokwisi egisal. Gak yogo minisi da egisal, ae dabilgo mini, ae molan molan agisal. Anjek gaga dima nandabi pisosok.

18 Yanj do anjek nawa gen on gamisat. Nak dakon golno kindapmon sonba gwaljigi minisi anj unun gol ban yubi kan, monenjo morapmisi tanj gamdan. Ae giptimgo wam do imal kwakwagi ban yubi kan, amin da gandaba molan dima agipbi, ae mayagigo mini. Ae dabil marasin di yumanjek dabilgokon yopbi kan, tagisi sintokdisal.

19 But dasi galak tanj yomisat amin unun tebai yoyinjek anpakni panjkilek ani do jigi yomisat. Do anpakgo panjkilek ak do pi tebai anjek but tobil abi.

20 Nandaki! Nak yomakon agek yoma domon tidanek yanj yosot: Nak yutnon tagi wikenj? Amin kinda tekno nandanek yoma witdaljak kan, nak wigiko unun gat egek jap nonden.

21 Amin kinda emaron teban tosak kan, unun amin do yanj dagan ibo kila amin madep yityit tamonokon nak gat kisi yitden. Kalip nak da emaron teban tanjek Datno gat kisi kila amin madep yityit tamonikon yikgin unuden yitden.

22 Amin mirakni toŋ da Telagi Wup da panmuwukbi do gen yosok unun pakyansi nandani.”

Sipsip Moniŋ da Kwen Kokupmon Papia Kında Witdalakwan Miktım Aminon Yo Yokwisi Noman Tokdan

(Kilapmi 4-11)

4

Kwen Kokupmon Piŋkop gawak iman

¹ Uŋun da kwenon aeno kaŋapbo Kwen Kokupmon yoma kında witdal kigit da taŋban kagim. Kaŋapbo amin uŋun kalip nak do kweŋ da yaŋ tebaisi yaŋ tidanek yaŋ namgut uŋun da yaŋ yagit, “Idon wiŋaki yo morap don altokdan goliko.”

² Nayinban uŋudon gin Telagi Wup da butnokon pigi madepsi tugagit. Anakwan Kwen Kokup kila amin madep yityit tamo kında taŋban kagim. Uŋun tamokon amin kında yikban kagim.

³ Uŋun amin tip jasper ae tip gami konilian da yaŋ tenjenagit. Kilap ban kında da kila amin madep yityit tamo uŋun anğwasigit. Kilap ban kildani uŋun tip kalikaligi emeral yaŋ.

⁴ Kila amin madep yityit tamo 24 kabi da kila amin madep yityit tamo uŋun anğwasinek taŋba pindakgim. Uŋun tamokon kila amin 24 kabi da yikgwit.* Uŋun kila amin imalni kwakwagi ban pawit, ae busunikon pelit kildani toŋ gol ban wasanbi ban pawit.

4:1: PA 1.1,10 **4:2:** Ais 6.1 **4:3:** Esi 1.28 **4:4:** PA 3.18

* **4:4:** Uŋun kila amin uŋun anjelo man madepni toŋ kabi kında do yosok.

⁵ Kila amin madep yityit tamokon da mal dakon tenjen da yangwit. Anakwa nandanapbo wuwik madepsi noman tanakwa kiririn agit. Kila amin madep yityit tamo noman da kalin 7 kabi sowit. Kalin unun Pin kop dakon wupni 7 kabi.

⁶ Kila amin madep yityit tamo noman da yo kind a tagit, unun tap idap daman glas ban wasanbi yombem, ae wagil kwakwagisi.

Yo 4 kabi egip egipmi ton unun kila amin madep yityit tamo dakon ilen 4 kabikon akgwit. Yo 4 kabi unun burikon ae manjikon kisi dabil morapmi da giptimi kisi ilimikgwit.

⁷ Yo egip egipmi ton kind a unun laion yombem. Ae kind a unun bulmakau wili yombem. Ae kind a unun tomno dabilni amin dakon yombem. Ae kind a unun singin madep kwen agegisak yombem.

⁸ Yo 4 kabi egip egipmi ton kalon kalon unun kisi piri 6 kabi tan yomin yomin awit. Anakwa giptimi kalon dabil morapmi da ilimikgwit. Ae piri da mibilgwan kisi tawit. Gildari ae kalbi kisi ak nandari mini yan yon,

“Telagi, telagi, telagi.

Amin Tagi Pin kop Tapmim Ami kalipsi egipgut,
ae abisok egisak,
ae don apdisak,
unun telagisi” yan yon.

⁹ Yo egip egipmi ton kabi unun da Amin unun kila amin madep yityit tamonikon yikdak ae egip egip dagok dagogi mini egisak unun do kisik kisik

madepsi anek mani awigek ya yan iyan. Bisapmi bisapmi yo 4 kabi egip egipmi ton unun yan anakwa

¹⁰ kila amin 24 kabi da Amin unun kila amin madep yityit tamokon yikdak unun da buron man pokgon. Man pagek egip egip dagok dagogi mini egisak Amin unun gawak iman. Ae pelitni kildani ton gol ban wasanbi unun kila amin madep yityit tamo tosok unudon noman ilik yopmanek kap yan yon,

¹¹ “Amin Tagi Pinjkopnin,

gak da yo morap galaktokgokon wasagil da abisok ton.

Yan agil do minjat amin morap kisi da gak do kisik kisik madepsi anek mango awigini, ae tapmimgo madepsi da yongangwan pinji egipni kan tagisi.”

5

Jon da papia kindu kili sogwit kagit

¹ Amin unun kila amin madep yityit tamokon yikgit unun kisitni amin tet do papia gironjiki kindu tanban kagim. Papia unun teri teri kildani ton, ae kendol pakbi ban kosiri 7 kabi anteban abi.

² Ae anelo tapmimi tonji kindu kanapbo gen papmon da yan tidanek yan yagit, “Namin amin kilegisi kindu dasi kendol pakbi ban panteban abi pakdegek papia tagi witaljak?”

³ Mani amin Kwen Kokup ekwan, bo ae miktimon ekwan, bo ae miktim da mibiligwan ekwan kindu da papia unun aripmi dima witaljak bo ae aripmi dima kosak.

⁴ Nak papia unun amin kinda da aripmi dimasi witaljak bo ae kosak yan kanek kunam madepsi sanbek sanbek morapmi takgim.

⁵ Yan anapbo kila amin kabikon da kila amin kinda da yan nayigit, “Gak kunam dima takgi. Koki! On Laion Juda amin kabikon altagit, unun Dewit dakon babinikon gugui unun da don noman tan wigit. On Laion emaron teban tagit. Yan agit do unun da papia kendol pakbi ban kosiri 7 kabi panjeban abi unun pakdegek tagi witaljak.”

Jon da Sipsip Moniḡ kagit

⁶ Yan nayinakwan Sipsip Moniḡ kinda akban kagit. Unun paret ak do si anakba kimagit yombem. Unun kila amin madep yityit tamo da binapmon agakwan yo 4 kabi egip egipmi ton gat ae kila amin gat da angwasiwit. Sipsip Moniḡ unun jomni 7 kabi, ae dabilni 7 kabi. Dabilni unun Pinjok dakon wupni 7 kabi. Unun Pinjok da yabekban miktimi miktimi kin mudawit.

⁷ Kili Sipsip Moniḡ da kila amin madep yityit tamokon kin Amin yikgit da kisiri amin tet do papia tagit unun abidagit.

⁸ Papia unun abidanakwan yo 4 kabi egip egipmi ton, ae kila amin 24 kabi gat da Sipsip Moniḡ da kapmatjok man pakgwit. Kisisi kalon kalon gita moniḡni gat ae gol idapni gat timik timik awit. Gol idapmon yo kibani tagisi tugawit, unun Pinjok dakon minjat amin kabiyo dakon bisitni.

⁹ Yan anek kap kalugisi kinda yan yawit,

“Gak da papia gironjikbi abidanek kendol pakbi
 ban panjeban abi unun aripmi tagi pakdekgi.
 Nido gikba kimagek yawigo nan minjat aminyo
 Pinjkop do im do anek yuman nagil.
 Asi, amin mibili mibili ekwan,
 ae geni mibili mibili,
 ae giptimni mibili mibili,
 ae miktimi miktimi ekwan kisi yuman nagil.
¹⁰ Yuman nanek amin kila ani do manjin yopgul,
 ae nin dakon Pinjkop dakon oman ani do
 mukwa sogok amini manjin yopgul.
 Unun da kila amin madep egek miktimon
 amin kilani akdan.”

Sipsip Monin dakon man anjisiwit

¹¹ Kili aeno kan egapbo anelo morapmisi dakon
 geni nandagim. Unun anelo dakon tilakni milion
 morapmisi ae tausen morapmisi da arip. Unun
 anelo kila amin madep yityit tamo ae yo egip
 egipmi tonj ae kila amin kabi ban pangwasinek akg-
 wit.

¹² Yan tidanek kap kinda yan yawit,
 “Sipsip Monin on kalip anakba kimakgit.
 Unun da man madep gat,
 ae yo tagisisi morap gat,
 ae nandak nandak tagisi gat,
 ae tapmimi wukwisi unun kisi tagi timitjak.
 Amin morap kisi da mani anenagek kisik kisik
 an iminek ya yan iyini kan unun kilegisi.”

13 Ae yo morap Pin kop da wasagit unun dakon geni kisi nandagim. Yo morap Kwen Kokup ekwan, ae miktimon ekwan, ae miktim kagagwan ekwan, ae tap kaga ekwan kisi dakon geni nandagim. Unun da yan yawit,

“Amin unun kila amin madep yityit tamonikon yikdak,
ae Sipsip Monin gat kisi,
nin jil dakon tilim gat ae tapmim gat pindagek
kisik kisik anek dagok dagogi mini man
madep damaman.”

14 Anakwa yo 4 kabi egip egipmi ton unun da yan yawit, “Unun asi.” Yan anakwa kila amin kabi da man pagek gawak yongwit.

6

Sipsip Monin da kendol ban papia son anteban awit unun pakdegit

¹ Nak kanapbo Sipsip Monin da papia gironjibi abidanek kendol pakbi ban kosiri 7 kabi panteban abi unun mibiltok nani pakdegit. Pakdegakwan yo egip egipmi ton 4 kabikon da kind a gen yagit. Geni unun kiririn da yan yagit, “Gak op.”

² Aeno kanek os kwakwagi kind a kagim. Unun da kwenon amin kind a obipni abidanek yikgit. Unun amin do kila amin madep dakon pellet kind a imgwit. Iba emaron teban tagit da tilagon kigit. Kinjek emat morapmi sigin anek teban token yanon da nandanek kigit.

³ Sipsip Moniņ da kendol pakbi ban papia anġteban abi 2 uņun pakdekgit. Pakdegakwan yo egip egipmi toņ 2 uņun da yagit, “Gak op.”

⁴ Yanakwan os gami kinda apban kagim. Uņun da kwenon amin yikgit uņun do tapmim ibi. Uņun tapmim uņun on miktimon yawori tosok uņun paņdagosak dakon tapmim. Paņdaganban amin da notni dapmaņ dapmaņ anek kimotdaņ. Uņun pi asak do emat agak siba madepsi kinda ingwit.

⁵ Kili ae Sipsip Moniņ da kendol pakbi ban papia anġteban abi 3 uņun pakdekgit. Pakdegakwan yo egip egipmi toņ 3 uņun da yagit, “Gak op.” Yanakwan os pilisi kinda kagim. Uņun da kwenon amin kinda yikgit, uņun jap kokwin agak yo kinda kisirikon abidagit.

⁶ Anakwan amin dakon tek yombem kinda nandaņapbo yo egip egipmi toņ 4 kabikon da yaņ yagit, “Amin kinda gildat daman kinda dakon pi asak dakon tomni timitjak uņun wit yigi moniņisok kinda gin abidosak, bo bali kwoba kapbi gin timitjak. Mani gak olip nelak gat ae wain gat dima paņtasik abi.”

⁷ Sipsip Moniņ da kendol pakbi ban papia anġteban abi 4 uņun pakdekgit. Pakdegakwan nandaņapbo yo egip egipmi toņ 4 da yaņ yagit, “Gak op.”

⁸ Yanakwan os kilonkiloni kinda kagim. Uņun da kwenon amin kinda yikgit uņun mani Kimot. Amin Kili Kimakgwit Dakon Kokupni uņun kapmatjok da yolgit. Amin miktimi miktimi ekwan kokwin 4 kabi anek kabi kinda dapbal kimotni do tapmim

yobi. Diwari emat agak siba ban dapbal kimotni, ae diwari jap do madepsi anek kimotni, ae diwari sot yokwisi da timitjak, ae diwari jon bit kilapyo da dapman noni.

⁹ Sipsip Moniŋ da kendol pakbi ban papia anteban abi 5 unun pakdekgit. Pakdegakwan amin kimakgwit dakon wupni alta da mibilgwan pindakgim. Kalip unun amin da Pin kop dakon gen tebaisi abidanek unun dakon yan ten tenok anakwa uwal da dapba kimakgwit.

¹⁰ Amin wup unun da tebaisi yan tidanek yan yawit, “Amin Tagi Tapmin Ami, gak telagisi egisal, ae anpakgo wagil bamisi gin. Nin bisap nian dasi gak do jomjom anapno miktim amin gen pikon yopmanek yawinin dakon kobogi yobi?”

¹¹ Yanba unun amin do paba pigik dubagi kwakwagisi kalon kalon yominek yan yoyiwit, “Ji jomjom pisipmisok ani. Uwal da oman amin pi isalji gat, ae notji gat dapdan. Ji dikba kimakgwit, yan gin dapba kimotdan. Amin nian da dapdan unun Pin kop da kili manjigit. Uwal da unun kisisi dapman mudanakwa don Pin kop da yawisi dakon kobogi yomdisak.”

¹² Sipsip Moniŋ da kendol pakbi 6 papia anteban awit unun pakdekgit. Pakdegakwan miktim wudip madepsi agit. Anakwan gildat dabil yik garan yombem pilisi agit, ae kanek gimansi yawi yombem agit.

¹³ Anakwan gik kundukon ton miktimon mawit. Gik mawit unun pik kindap dakon sopmi dima pek

6:11: PA 7.9,13; 19.14
16.18 **6:13:** Ais 34.4

6:12: Mt 24.29; Ya 2.20; PA 8.12; 11.13;

tañakwa mirim da pisonakwa mon unun da tilak mawit.

¹⁴ Anjakwa papia gironik yopmangaman, unun da tilagon kundu si kin pasilgit. Anjakwan kabap gat ae tap binap miktim tim ton unun tamoni yopman degek duwalik kiwit.

¹⁵ Anjakwa miktim dakon kila amin madep gat, ae amin man madepni ton gat, ae emat amin dakon mibiltok amini gat, ae yoni morapmi amin gat, ae amin tapmimi ton gat, ae oman amin, ae amin morap isal ekwan, unun kisisi pasal kin tip gopbatgwan ae kabapgwan tip madep ton unun da mibiligwan pasil do kiwit.

¹⁶ Anek kabap gat ae tip gat do yan tidanek yawit, “Ji nin da kwenon man witjin nimanakwa pasili egipnen. Pasili egapno Amin unun kila amin madep yityit tamonikon yikdak unun dima nin-dasak, ae Sipsip Monin butjap damani nandanek kobogi yokwi dima nimjak.

¹⁷ Amin do butjap madepsi nandanek kobogi yokwisi yomdamal dakon gildat madep kili unun abik. Namin amin dasi tapmimni unun abin yipmanek tagi egipjak?”

7

Israel amin 144 tausen da Pinokp dakon tilak abidawit

¹ Unun da kwenon anelo 4 kabi miktim dakon kodigi 4 kabikon akba pindakgim. Mirim da miktim gat ae tap gat ae kindap gat dima pisoni yan do mirim 4 kabi unun tebaisi timikgwit.

6:14: PA 16.20
Jol 2.11; Mal 3.2

6:15: Ais 2.10,19,21
7:1: Jer 49.36; Dan 7.2

6:16: Lk 23.30

6:17:

² Yan anakwa anelo kinda gildat wisak tetgin da apban kagim. Unun da Pinjkop egip egipmi ton dakon tilak aminon yop do yo kinda abidanek apgut. Abinek anelo 4 kabi Pinjkop da miktim gat tap gat panjasik ani do tapmim yongut unun do madepsi yan tidagit.

³ Yan tidanek yan yagit, “Ji miktim ae tap ae kindap tepmisi panjasik ak do dima nandani. Mibiltok Pinjkopnin dakon tilak pi monjini da injamon yopdaman. Yan anapno don yo morap tagi panjasik ani.”

⁴ Ae nandanapbo amin tilak timikgwit dakon tilak yanba nandagim. Israel amin kabi morap da binapmon amin 144 tausen da tilak unun timikgwit.

⁵ Juda amin kabikon amin 12 tausen da timikgwit.

Ae Ruben da kabikon 12 tausen

ae Gat da kabikon 12 tausen

⁶ ae Ase da kabikon 12 tausen

ae Naptali da kabikon 12 tausen

ae Manase da kabikon 12 tausen

⁷ ae Simeon da kabikon 12 tausen

ae Liwai da kabikon 12 tausen

ae Isaka da kabikon 12 tausen

⁸ ae Sebulan da kabikon 12 tausen

ae Josep da kabikon 12 tausen

ae Benjamin da kabikon 12 tausen.

Unun amin da Pinjkop dakon tilak timikgwit.

Mijat amin morapmi da Pinjkop gawak imgwit

⁹ Ae unun da kwenon amin morapmisi pindakgim, unun manjiri mini. Amin unun amin kabi kabi egi egi an unun morap kisi dakon. Ae

miktım morap kisi, ae giptım mibili mibili, ae gen mibili mibili unun kila amin madep yityit tamo, ae Sipsip Monji da inamon akgwit. Unun ilikba pigik kwakwagisi ae dubagi ban pawit. Ae kisirikon jobban tam ban timikgwit.

¹⁰ Unun amin kabi madep tebaisi yan tidanek yan yawit,

“Pinjkopnin kila amin madep yityit tamonikon yikdak, ae Sipsip Monin kisi unun dagin nin yokwikon ban timikbal tagisi ekwamanj.”

¹¹ Anakwa anelo morap kila amin madep yityit tamo, ae kila amin, ae yo 4 kabi egip egipmi ton unun panjwasinjek akgwit. Agek kila amin madep yityit tamo kanek man pagek tomno dabilni miktıngwan yopmanek Pinjkop gawak imgwit.

¹² Anek yan yawit,

“Unun asi! Nin dagok dagogi mini Pinjkopnin do ya yan iyinjek kisik kisik madepsi anek man madepni do yan tenjenonenj.

Dagok dagogi mini nandan kokwini tagisi, ae tapmim madepni tan imdisak. Unun asi!”

Unun amin kabi dakon tepmi kili unun mudosok

¹³ Kila amin kabikon da kindi da yan nayigit, “On amin ilikba pigik dubak kwakwagi payin unun namın? Ae dukwan da aben?”

¹⁴ Yanban iyigim, “Amin tagi, gaga nandisal.”

Yanapbo yan nayigit, “On amin uwal da kisiron jigi tepmiyo madepsi pawit da abisok tagi ekwanj. Imalni Sipsip Monin dakon yawi ban suganba kwakwagisi awit.

15 Yan awit do anek Pin kop dakon kila amin madep yityit tamokon noman akgan. Gildari ae kalbiyo Telagi Yut Madepnikon egek omani an iman. Pin kop kila amin madep yityit tamokon yikdak, iyi unun gat egek pan kutnosak.

16 Jap do ae dima akdan, ae pakbi do dima akdan. Gildat da giptimni tebai dima pindatjak, ae yo kinda da giptimikon pindakban tedepmi dima nandakdan.

17 Nido, Sipsip Monin kila amin madep yityit tamo da binap yikdak, unun da kila amini egipdisak. Anek pakbi egip egipmi ton da dabilikon unudon pan kikedisak. Anakwan Pin kop da dabil pakbini kisisi wiririkban kunam sanbenek dima tatdan.”

8

Sipsip Monin da kendol pakbi ban pan teban abi 7 unun pakdegit

1 Sipsip Monin da kendol pakbi 7 papia anteban awit unun pakdegit. Pakdegakwan Kwen Kokupmon wayini minisi tagit. Yan tanakwan wigi 30 minit da tilak agit.

2 Ae koko anelo 7 kabi Pin kop da inamon akgan unun do kwen 7 yan yoba timikgwit.

3 Anakwa ae anelo kinda alta da kapmatjok pan ki aagit. Unun anelo gol idap kinda yo kibani tagisi unudon idawik mukwa kibani tagisi sok do abidagit. Anakwan yo kibani tagisi morapmisi imgwit. Iba Pin kop dakon amin dakon bisit gat timik kakwanek alta gol ban wasanbi Pin kop dakon

kila amin madep yityit tamokon noman tosok, unjudon mukwa son ingut.

⁴ Yan anakwan mukwa kibani tagisi gat, ae Pinjokop dakon amin dakon bisitni gat, anjelo da kisiron da Pinjokop da injamon wigiwit.

⁵ Anakwa anjelo da kindap altakon tagit unun abidan mukwa soksok idapgwan yopban tujanba kindap maban miktimon mawit. Miktimon manakwa mal dakon tenjeni da yangwit. Anakwa nandanapbo wuwik madepsi noman tanakwa kiririn agit, ae miktim wudip agit.

Anjelo 4 kabi da kwenj pisowit

⁶ Anakwan anjelo 7 kabi unun kwenj 7 kabi timikgwit unun pisok do tagap tawit.

⁷ Anjelo mibiltok akgit unun da kwenjni pisonakwan ais ae kindap ae yawi gat panjokolop abi gat kisi miktimon mawit. On miktim daman ae kindapyo kokwin aba kabi kapbi anakwa miktim kabi kindasogit, ae kindap dakon kabi kindasogit. Ae jon kaluk kalugi kisisi son mudawit.

⁸ Ae anjelo unun da bunjon nani kwenjni pisogit. Anakwan yo kindasogit kabap madepsi yombem si sonakwan, maba tap kaga pigimagit. Unun tap kokwin aba kabi kapbi anakwa kabi kindasogit yawi dagagit.

⁹ Ae yo egip egipmi ton tap kagagwan ekwan unun kokwin aba kabi kapbi anakwa kabi kindasogit kimakgwit. Ae tap wakga yo kisi kabi kapbi kokwin anakwa tap wakga kabi kindasogit wagilsi tuwil ki tasik tawit.

¹⁰ Ae anjelo 3 kwenjini pisogit. Anjakwan gik madepsi kinda kalinj da yanj sojek kundu yipman abinj magit. Unjun pakbi madep pokgon unjun kabi kapbi yanj kokwin awiron kabi kindakon magit. Ae pakbi dabilon magit.

¹¹ Gik unjun dakon mani unjun Yo Isipmi ae Emarit Tonj. Unjun abinj pakbi kabi kindakon manjakwan pakbi unjun isipmisi agit, do amin morapmisi pakbi unjun nanjek kimakgwit.

¹² Ae anjelo 4 kwenjini pisogit. Anjakwan gildat ae kanek ae gikyo unjun kokwin aba kabi kapbi anakwa gildat kabi kinda ae kanek kabi kinda ae gik morap dakon kabi kinda panjupbal anjakwan pilin tuk awit. Yanj awit do gildari dakon ae kalbi dakon tenjenji tagi dima tenjenjawit.

¹³ Unjun da kwenon singinj madepsi kinda kwen binap akwan kagim. Singinj unjun madepsi yanj tidanjek yanj yagit, “Bupmisi, bupmisi, bupmi madepsi miktimon ekwan amin. Anjelo kapbi kwenjini pisokdanj, anakwa miktimon amin jiggi madepsi pakdanj.”

9

Anjelo 5 kwenjini pisogit

¹ Anjelo 5 unjun kwenjini pisonjakwan gik kinda kundukon da abinj miktimon kili magit kagim. Gapma dubagisi ae kidagi mini unjun dakon yoma witdal unjun gik do imgwit.

² Anakwa gik da gapma unjun witdalakwan unjun gapmagwan da kindap madepsi sosok dakon

8:11: Jer 9.15 **8:12:** Esi 32.7; PA 6.12-13 **8:13:** PA 9.12; 11.14

9:1: PA 20.1 **9:2:** WW 19.28; TP 10.12-15; Jol 2.2,10

mukwa da wigit. Mukwa gapmagwan da wigit unun da gildat dabil gat ae kundu gat dakon kosit sopmanakwan pilin tuk agit.

³ Anakwan pilak pilak da mukwa kagagwan da miktimon mawit. Unun pilak pilak do skopion dakon tapmim yomgwit.

⁴ Pilak pilak unun yan yoyiwit, “Ji jon gat, ae yo mibili mibili miktimon kwon gat, ae kindap gat unun dima panupbal ani. Ji amin Pinkop dakon tilakni inamikon mini unun ban gin panupbal ani.

⁵ Ji unun amin tepmi pi madepsi kanek 5 da butgwan tagi yomni, mani dima dapba kimotni.” Tepmi pi yomni unun skopion da amin injin yoba tepmi madepsi pan unun da tilagon yomdan.

⁶ Unun bisapmon amin kimot do kosit wisik akdan, mani kimot dima kokdan. Kimot do tagisi nandakdan, mani sigin egipdan.

⁷ Pilak pilak unun os amin da emat do pantagap an yombem pindakim. Busunikon pelit gol ban wasanbi yombem da tan yomgwit. Tomno dabilni unun amin dakon yombem.

⁸ Busun dangwani unun dubagisi minjat dakon yombem, ae geni unun laion dakon yombem.

⁹ Paba pigik ain yombem ban pibiri witjiwit. Piri unun karis morapmi os da emaron kik do ilik pawilakwa wuwik madepsi noman ton unuden awit.

¹⁰ Paljigi skopion dakon yombem, pakbi emari ton aminon yopban pigini dakon kisikni paljigikon tan yoman. Kanek 5 yan amin tepmi madepsi yomyom dakon tapmim tan yoman.

¹¹ Gapma dubagisi kidagi mini dakon aneloni da kila amin madepni egi yomgut. Ibru genon da unun anelo do Abadon yan yawit. Ae Grik genon da Apolyon yan yawit. Unun gen dakon mibili: Yo Morap Pantasik Ak Amin.

¹² Jigi mibiltok altogi, kili unun altan mudak. Nandabi. Jigi bamori don noman tokdamal.

Anelo 6 kweni pisogit

¹³ Anelo 6 kweni pisonakwan gen kinda noman tanban nandagim. Alta gol ban wasanbi, Pin kop da inamon toso, unun dakon kodigi 4 kabikon jom 4 kabi tawit unudon da yagit.

¹⁴ Gen unun altagit da anelo kwen abidagit unun yan iyigit, “Anelo 4 kabi pakbi madep Yupretiskon panjeban awit da ekwan unun wital yopbi kini.”

¹⁵ Yanban anelo 4 kabi unun kin amin morap miktimon ekwan unun kabi kapbi kokwinigek, kabi kind si dapba kimotni do wital yopgut. Anelo kabi unun kili noman tawit da pi unun ak do awa ae gildat, kanek, ae bilakyo dogin jomjom awit.

¹⁶ Ae nandanapbo emat amin oskon yikgwit dakon tilakni yawit, unun 200 milion yan. Tilakni nandanapbo yawit.

¹⁷ Unun dipmin yombem kanek os gat ae amin os kwenon yikgwit, unun yan pindakgim: amin unun emat dakon yik imalyo pawit. Paba pigik unun gami, ae pili, ae kilonkiloni ban pawit. Os dakon busuni unun laion dakon busuni yombem. Anakwa os da gen kagagwan da milen asip ae mukwa ae salfa tip si sonjek wawit.

18 Uņun amin kokwin kabi kapbi anek, yo yokwi kapbi uņun os da gen kagagwan da altawit da minat aminyo kabi kinda dapba kimakgwit.

19 Os uņun dakon tapmimni gen kagani gat ae paljigi garon tawit. Paljigi uņun tuņon amin emari toņ yombem. Paljigi diwarikon tuņon amin dakon busuņi toņ, do uņun ban amin panupbal awit.

20 Amin diwari uņun yo yokwisi kapbi da dima dapba kimakgwit amin but tobił dima awit. Koņ gat ae kokup kidat iyi kisit da wasawit gat sigin gawak yomgwit. Kokup kidat uņun gol ae silwa ae ain kinda mani bras ae tip ae kindap ban wasawit, uņun dima sintoņ ae gen dima nandaņ ae kosit dima akwan.

21 Uņun amin da amin diwari dapba kimakgwit, ae sot mawomyo anek yo tapmimi toņ diwari pawilgwit, ae yumabi awit, ae amin diwari dakon yo kabi pankisibiwit. Mani but tobił anek yo uņun yop do dima nandawit.

10

Aņelo da papia Jon do iban nagit

1 Ae kaņapbo aņelo tapmimi toņ kinda Kwen Kokup da pigit. Uņun giptimi gikwem naņ wamgut, ae busuņi da kwenon kilap ban kinda tagit. Tomno dabilni gildat da yaņ tenņeņagit. Anakwan kandap bamotni milen asip yombem.

2 Uņun aņelo papia gironikbi moniņ kinda kisirikon abidagit, ae papia uņun wıtdal kwi da tagit. Uņun kandapmi amin tetgin do tap kwenon

yipgut, anek kandapmi teri kında miktimon bamagit.

³ Anek laion da madepsi yan tidon, unuden madepsi yan tidanakwan kiririn 7 kabi da madepsi yawit.

⁴ Kiririn 7 kabi yanakwa gen yawit unun mandak do agim, mani Kwen Kokupgwan da tek kında yan noman tagit, “Kiririn 7 kabi dakon gen unun nandak nandagokon gin toni. Dima mandabi.”

⁵ Kanapbo anelo tap idapmon ae miktimon baman akgit, unun kisiri amin tetni Kwen Kokup gin do anenakgit.

⁶ Anenagek gen yan anteban agit. Pin kop egip egip dagok dagogi mini egisak, kundu gat ae yo morap kundukon ton, ae miktim gat ae yo morap miktimon ton, ae tap gat ae yo morap tap kagagwan ton unun wasagit Amin da manon gen yan anteban anek yan yagit, “Bisap kili unun mudokdisak. Pin kop ae sanbenek jomjom dima akdisak.

⁷ Anelo 7 kweni pisonakwan Pin kop da yo ak do yagit da pasili ton, unun panalon aban bami ton akdisak. Unun gen kalipsigwan kombi amin pi monjini do yomgut.”

⁸ Anelo yan yanakwan tek unun Kwen Kokup da aeni noman tanej nayigit, “Gak kin anelo unun tap idapmon ae miktimon baman akdak da kision papia tosok unun abida.”

⁹ Nayinban kin anelo yan iyigim, “Papia monin unun nak do nam.” Iyiko yan nayigit, “Abidanek na. Gen kagagokon kaban dakon pakbini

10:4: Dan 12.4,9

10:5: GT 32.40; Dan 12.7

10:7: Am 3.7

10:9: Esi 2.8-3.3

yombem galagini tagisi akdisak, mani but kagagogwan emat akdisak.”

¹⁰ Yanakwan papia unun kisirikon nan abidanek nagim. Nanek gen kaganokon kaban pakbi yombem galagini tagisi nandagim, mani si nan mudanek butnogwan emat aban nandagim.

¹¹ Ae yan nayigit, “Gak aego minat amin morapmikon, ae miktim morapmikon, ae amin geni mibili mibili yonon, ae kila amin madep morapmikon yo noman tokdan, unun do kombi gen yoki.”

11

Amin bamori da Pin kop gen yan ten ten jagim al

¹ Amin kinda da tilak yopyop kindap kirin kinda naminek yan nayigit, “Gak pidanek Pin kop dakon telagi yut gat ae alta gat tilak yopman. Yan anek amin unun yutgwan Pin kop gawak iman unun manjiki.

² Mani tamo wanga da tosok unun Amin Nwaktari Kabi da egipni do parekbi, do unun tilak dima yipbi. Unun amin kabi da abin Pin kop dakon telagi kokup pap pabin yopmanek kila tebaisi anek bamanakwa kanek 42 yan akdisak.

³ Anakwa nak da amin bamori unun geno yan ten ten onjil do tapmim yoben. Amin bamot unun bupmi dakon yik imalyo ban pakdamal. Anek nak dakon gen yan ten ten anakwal gildat 1,260 yan akdisak.”

⁴ Amin bamot unun miktim daman dakon Amin Tagini da inamon olip kindap bamot ae lam bamot akgamal unun mani.

⁵ Uwalni da yo yokwi an yomni kan, kindap gen kaganikon da noman tanek sonba mini an. Asi, amin di unun amin bamot yo yokwi an yomni kan, kosit yanon da si kimotdan.

⁶ Unun amin bamot kundu kosit sopman ibal kombi gen yonjil bisapmon sikak dima moni dakon tapmim tan yoman. Ae pakbi kulabik abal yawi dagoni dakon tapmim kisi tan yoman. Ae miktim aminon wasok mibili mibili abal amin yokwi toni dakon tapmim kisi tan yoman. Yo unuden galaktoknikon tagi anjil.

⁷ Pinjop dakon gen yan tentenan anki wasip anakwal, jon kilap yokwisi kinda unun gapma kidagi mini yipman degek kwen wikdisak. Win amin bamot gat emat wamanek amin bamot pabin yopmanek dapban kimotdamal.

⁸ Anakwan bumjotni unun kokup pap da kosit oba madepmon tokdamal. Kokup pap unun tilak anek mani Sodom ae Isip yan jon. Unun kokup pap unuden gin kalip Amin Tagini tilak kindapmon anakba kimakgit.

⁹ Amin mibili mibili geni mibili mibili yon, ae giptimni mibili mibili, ae miktimi miktimi ekwanon da amin morapmisi da gildat kapbi ae gildat teri kinda amin bamot dakon bumjot pindatdan. Ae yum pindagakwa amin da bumjotni dimasi wayitni do yokdan.

11:4: Sek 4.3,11-14 **11:5:** 2Sa 22.9; Kap 97.3 **11:6:** TP 7.17-20; 1Sa 4.8; 1KA 17.1 **11:7:** Dan 7.21; PA 12.17; 13.7; 17.8 **11:8:** Lk 13.34

¹⁰ Miktim amin da amin bamot unun kili wagil kunwamal yan pindagek, but kwaktok nandanek notni do but galak yo yomdan, nido kombi amin bamot unun miktim amin tepmi madepsi yomgumal.

¹¹ Mani gildat kapbi gat ae gildat teri kinda kin mudanakwa, Pinjkop da egip egip mirim yipban amin bamot da butgwan pukwa pidan akgimal. Agakwal amin bamot pindakgwit amin unun madepsi pasalgwit.

¹² Anakwa amin bamot unun nandanakwal amin kinda da Kwen Kokupgwan da tebai yan tidanek yan yoyigit, “Jil idon winjil.” Yanakwan uwalni pindagakwa amin bamot gikwem kagagwan wigek Kwen Kokup wigigimal.

¹³ Wugakwal unudon gin wudip madepsi kinda anakwan kokup pap dakon timi kinda tasik tagit. Anakwan timi 9 kabi dagin tagi tawit. Unun wudip da amin 7 tausen yan dapban kimakgwit. Anakwa si egipgwit amin madepsi pasalek Kwen Kokup Pinjkop dakon man yan ankisiwit.

¹⁴ Kili jigi madepsi kosiri 2 kili unun mudak. Mani nandani, bisap pisipmisok egek jigi 3 noman tokdisak.

Anjelo 7 kwen pisogit

¹⁵ Kili anjelo 7 kweni pisogit. Anakwan nandanapbo Kwen Kokupgwan da madepsi yan tidanek yawit, “Pinjkop Amin Taginin gat ae Kristoni gat, unun bamot miktimi miktimi dakon

kila amin madep dagamal. Amin Tagi da kila amin madep dagok dagogi mini egi wugikdisak.”

¹⁶ Anjakwan kila amin 24 kabi iyi da kila amin madep yityit tamokon Pinjop da inamon yikgan, unun n̄wakben̄ anek tomni dabilni miktimon yopmanek Pinjop gawak imgwit.

¹⁷ Anek yan yawit,
 “Amin Tagi Pinjop Tapmim Ami,
 gak abisok egisal,
 ae kalipsigwan egipgul.
 Tapmim madepgo abidanek kila amin madep
 pigo wasanek asal,
 do nin ya yan gayaman̄.

¹⁸ Pinjop do kuraktok an amin unun Pinjop do butjap madepsi nandawit, mani gak da butjap madepsi pakdisal bisap kili unun noman tosok. Abisok amin kimakgwit gen pigokon opni dakon bisap. Abisok pi monjigo do tomni tagisi yomdisal dakon bisap. Unun kombi amin, ae gaga dakon min̄at amin kabi, ae gak dakon man do pasalek ekwan̄ amin, unun amin mani ton̄ ae mani mini kisi do tomni tagisi yomdisal. Abisok min̄at aminyo pan̄upbal awit amin, unun pan̄tasik aki dakon bisap.”

¹⁹ Kila amin da yan mudan̄akwa, anelo da Pinjop dakon Telagi Yut Madep Kwen Kokup tosok unun witalgwit. Anakwa Pinjop dakon San̄bek San̄bek Kinam Telagi Yut Madepmon tan̄ban kawit. Mal da

dukwan dukwan yamanakwan kiririn unun wuwik madepsi yagit. Anakwan miktim wudip anakwan ais morapmi sikak da yan mawit.

Sunduk gat amin kabini gat wagisi tasik tawit

(Kilapmi 12-20)

12

Jon da minat gat ae nugim yokwisi madep gat pindagit

¹ Kili kundukon tilak nwanjwarisi kindanoman tagit. Tilak unun yan: Minat kindan gildat dabil nan imali do wamgut. Anakwan kanek kandapni da mukgan tagit, ae gik 12 kabi da busujikon peliri do tan ingwit.

² Minat unun monji kwapni ton. Monji altok do anakwan tepmi nandanek madepsi yan tidagit.

³ Ae kundukon tilak kindanoman tagit. Tilak unun yan: nugim yokwisi giptimi gami madepsi kindanoman tagit. Unun nugim yokwisi unun busujini 7 kabi. Anakwan jomi 10 yan busujikon kwawit. Anakwan kila amin madep pelit 7 kabi da busujikon tawit.

⁴ Unun dakon paljigi da kundukon gik morapmi wiririkban miktimon mawit. Unun gik kokwin kabi kapbi anek, unun dakon kabi kindan kisisi miktimon mawit.

Nugim yokwisi unun minat unun da monji anjalak do agit unun da inamon akgit. Minat unun da monji anjalaban monji unun si nok do jomjom anek akgit.

⁵ Anjakwan miñat unun monji wili anjalagit. Unun wili da kila agak dakon ain teban abidanjek miñat amin morap miktimon ekwan unun kila tebaisi akdisak. Miñat monji altanban unudon gin anjan kwen Pinjkop ae Pinjkop da kila amin madep yityit tamo unudon awigiwit.

⁶ Anakwa miñat unun pasal kin miktim amini minikon kigit. Unudon Pinjkop da tamoni kili anroman agit. Unudon kilani anek jap iminakwa wigi gildat 1,260 yan asak.

⁷ Kili Kwen Kokup emat madepsi kinda noman tagit. Maikel gat anelo kabini gat nugim yokwisi madep unun gat emat wamgwit. Ae nugim yokwisi madep gat ae anelo kabini kisi emat kobogi awit.

⁸ Mani emaron teban toni dakon tapmim dima tan yomgut, do Kwen Kokup ae sanbenjek dima egipgwit.

⁹ Pinjkop dakon anelo da nugim yokwisi madep maba pigigit. Nugim yokwisi madep unun kalipsigwan egipgut, miktimon amin morap yokwi ani do panjekwaldak. Mani kinda Kon, ae mani kinda Sunduk yan yon. Unun maba miktimon pigit, ae aneloni kisi unun gat maba piwit.

¹⁰ Kili unun da kwenon nandanapbo Kwen Kokupgan da amin kinda da madepsi yan tidanek yan yagit,

“Abisok Pinjkopnin da miñat amin kabini yokwikon ban timikdak. Tapmimni altan

tenjenanakwan kila amin madep yikdak. Anjakwan Kristoni man madepni gat ae tapmimni gat abisok timikdak. Nido, notnin gen yan yomisak amin abisok anelo da kili maba pigik. Unun gildat kalba ae kalbiyo Pinjopnin da inamon gen yan yomgut.

¹¹ Notnin egip egipni panjutnok do dima nandawit. Sipsip Monin da yawikon, ae Pinjop dakon gen yan tenjenawiron da tapmim panek emaron teban tanek uwal abin yipgwit. Kimot do pasol pasol dima awit.

¹² Kwen Kokup gat ae Kwen Kokup ekwan amin morap ji kisik kisik ani! Mani miktim gat ae tap gat yagosil! Nido Sunduk jikon kili pik. Pik da bisap pisipmisok egipdisat yan nandisak, do butjap madepsi nandisak.”

¹³ Nugim yokwisi unun nak maba miktimon pigim yan kanek, minat unun monji wili anjalagit unun ansopgut.

¹⁴ Mani nugim yipmanek dubagikon miktim amini minikon tagi pidan kisak do sinjin madepsi dakon piri bamori unun minat do imgwit. Unudon kin bilak kapbi ae bilak diwari kinda egakwan kilani anakwa nugim yokwisi madep da aripmi dima anupbal asak.

¹⁵ Kili nugim yokwisi madep unun da pakbi gen kaganikon da wandikgit. Pakbi unun pakbi madepsi da yan pak abigek minat unun yolgut. Nugim yokwisi unun pakbi pak abigek minat unun anan abigakwan pasiljak yanon da agit.

¹⁶ Mani miktim da minat anpuluganek gen kagani

anjan kinakwan nugim yokwisi madep da pakbi unun wandikgit unun miktim da si nan mudagit.

¹⁷ Anakwan nugim yokwisi madep unun minat do butjap madepsi nandagit, do minat unun dakon monji diwarî gat emat wam do kigit. Minat dakon monji unun Pinjkop dakon gen teban morap guramik kimokgon, ae Yesu dakon gen yan tenjenjek Yesu yolgan amin unun.

¹⁸ Nugim yokwisi unun tap idap da ilenikon akgit.

13

Jon kilap yokwisi bamori noman tagimal

¹ Ae kanapbo jon kilap yokwisi kindâ tap kagagwan da noman tan wigit. Unun busunî 7 kabî. Anakwan jomî 10 kabî da busunikon kwawit. Anakwa kila amin madep dakon pelit 10 kabî jomikon tawit. Ae busunikon man tan tan awit. Man unun Pinjkop jigilak mibîlî mibîlî yan imim dakon man da tawit.

² Jon kilap yokwisi unun kagim unun jon pusiket madep lepat yan yon, unun yombem. Mani kandapmî unun bea dakon yombem, ae gen kagani laion dakon yombem. Nugim yokwisi madep unun da iyî dakon tapmim, ae kila amin yityit tamoni, ae kila agak dakon yan dagok madepni, unun jon kilap yokwisi do imgut.

³ Unun jon kilap yokwisi dakon busunî kindâ si kimori da tilak wudani tan imgut, mani aeni kibidagit. Anakwan miktimon minat amin morap kisi unun kan nimnimigek yolgwit.

⁴ Nugim yokwisi madep unun da jon kilap yokwisi do kila amin pi asak do yan mudan imik, do nugim yokwisi madep unun gawak imgwit. Ae jon kilap yokwiyo kisi gawak iminek yan yawit, “Namin amin jon kilap yokwisi yombem? Ae namin amin gat emat aripmi tagi wamjil?”

⁵ Pin kop da yum kanakwan jon kilap yokwisi unun iyi do nandaban wigakwan Pin kop do jigilak yan imgut, ae kanek 42 da aripmon pi unun asak dakon yan dagok Pin kop da imgut.

⁶ Unun gen kagani wtdalek Pin kop jigilak yan imgut. Yan iminek Pin kop dakon man, ae Pin kop dakon kokup, ae amin Kwen Kokup ekwan kisi do manji gen yagit.

⁷ Pin kop da yum kanakwan Pin kop iyi dakon minjat amin kabikon emat agit. Emat anek dapmanek pabin yopgut. Unun amin kisi dakon kila amin madep tagi egipjak, ae miktimi miktimi kisi, ae gen mibili mibili yon kisi, ae giptimi mibili mibili kisi dakon kila amin madep tagi egipjak dakon yan dagok an ibi.

⁸ Pin kop da miktim dima wasagit bisapmon amin morap egip egip papiakon mani dima mandagit, unun amin da jon kilap yokwisi gawak imdan. Papia unun Sipsip Monin kalip anakba kimakgit, unun dakon.

⁹ Amin mirakni ton da gen on pakyansi nandani!

¹⁰ Amin kinda dam tebanon pigisak do manjikbi kan, unun dam tebanon pigikdisak. Ae amin kinda emat agak sibakon kimotjak do manjikbi

kan, emat agak sibakon kimotdisak. Yo unuden noman tanba, Pin kop dakon minjat amin kabi butni yawori tanakwa tebai agek nandan gadatni tebaisi abidoni.

Jon kilap yokwisi 2 unun da miktim amin panjkewalgit

¹¹ Aeno jon kilap yokwisi kinda gat kanapbo miktim kagagwan da wigit. Unun jomi bamori sipsip monin dakon jom yombem. Ae gen yogokni unun nugim yokwisi madep kinda egisak dakon yombem.

¹² Jon kilap yokwisi 2 unun da jon kilap yokwisi mibiltok nani dakon kila agak dakon tapmim kisisi yan dagok an ingut. Unun tapmim nan jon kilap yokwisi mibiltok nani da inamon pi agit. Unun tebaisi yoyinjakwan miktim gat ae minjat aminyoni gat da jon kilap yokwisi mibiltok nani gawak ingwit. Jon kilap yokwisi si kimori da tilak wudani tan ingut mani wudani aeni kibidagit.

¹³ Jon kilap yokwisi 2 unun da wasok tapmimi ton madep madep ban agit. Wasok tapmimi ton kinda agit unun yan: Amin da dabilon wasok aban kindap si sonjek Kwen Kokup yipmanjek miktimon piwit.

¹⁴ Pin kop da tapmim ininjakwan wasok tapmimi ton morap jon kilap yokwisi mibiltok nani da inamon anek miktim amin panjkewalgit. Anek jon kilap yokwisi unun kalip emat agak siba da anakgit, mani abisok egisak gin, unun dakon man yan ankisik do kindap ban wupni pasini do tebaisi yoyigit.

¹⁵ Pinƙop da tapmim iminƙwan egip egip dakon mirim jon kilap yokwisi dakon wupmi wasawit do iban gen yagit. Ae amin morap jon kilap yokwisi dakon wupmi wasanbi do dima gawak imni unun da si dapban kimotdan.

¹⁶ Jon kilap yokwisi 2 da tebaisi yoyinban amin morap dakon kisit amin tetnikon, ae inamnikon tilak kinda yipgwit. Amin isali, ae mani ton, ae yoni morapmi amin, ae yoni mini amin, ae oman amin dima ekwan amin, ae oman amin ekwan amin kisi tilak yopman yomgwit.

¹⁷ Do amin kinda unun jon kilap yokwisi dakon tilakni mini kan, aminon yuman nok dima asak, ae unudon yuman nok dima ani. Jon kilap yokwisi dakon tilakni unun iyi dakon mani, ae mani dakon namba.

¹⁸ Amin nandak nandakni tagisi da jon kilap yokwisi dakon namba pakyan si manjin nandisak. On unun amin dakon namba. Nambani unun 666.

14

Sipsip Monin dakon minat amini kap kalugi yawit

¹ Nak aeno kanapbo, Sipsip Monin Saion Kabap unudon akban kagin. Agakwan amin 144 tausen unun gat kisi akgwit. Sipsip Monin dakon man gat ae Datni dakon man gat inamnikon mandabi.

² Ae nandanapbo wuwik tagisi kinda Kwen Kokupgwan da apgut. Unun pakbi madep morapmi dakon wuwik yombem, ae kiririn madep

da yaŋ agit. Wuwík nandagim uŋun amin da gita tidaŋakwa gen yoŋ uŋun dakon wuwík yombem.

³ Kap kalugi kinda Piŋkop dakon kila amin madep yityit tamokon yawit. Ae yo 4 kabi egip egipmi toŋ da iŋamon ae kila amin da iŋamon yawit. Amin 144 tausen yaŋ Piŋkop da miktimon miŋat aminyo da binapmon yokwikon baŋ yumaŋ naŋ yopgut, uŋun kabi daŋin kap uŋun tagi nandaba pisosak.

⁴ Uŋun amin kabi miŋat gat yumabi dima aŋek gwaljigi minisi egipgwit. Kokup morap Sipsip Moniŋ da kik do agit, uŋun yol awilgaŋ gin. Uŋun Piŋkop da miktimon amin da binapmon baŋ yokwikon baŋ yumaŋ naŋ yopgut, do uŋun Piŋkop da miŋat amin kabini mibiltoksi timikgit da yaŋsi egipdaŋ. Yaŋ agit, do iyi gat ae Sipsip Moniŋ gat dakon miŋat amin kabi egipni.

⁵ Top gen kinda dimasi yawit. Gulusuŋni mini egipgwit.

Aŋelo kapbi da yaŋ tenŋenok awit

⁶ Nak aeno kaŋapbo ae aŋelo kinda kwen binap kwan kagim. Uŋun da Gen Bin Tagisi dagok dagogi mini amin miktimon ekwaŋ yoyiŋ tenŋenosak do yabekbi. Miktimi miktimi miŋat amin kabi morap, ae geni mibili mibili yoŋ, ae giptim kildani mibili mibili uŋun kisi do yabekbi.

⁷ Uŋun da abiŋ gen papmon da yaŋ yagit, “Piŋkop do pasal imiŋek man madepni yaŋ aŋenotni, nido Piŋkop da amin gen pikon yopjak dakon bisap madep kili abik. Piŋkop kundu ae miktim ae tap

ae pakbi dabil morap wasan yopgut unun gawak imni.”

⁸ Ae anelo kinda bujon yolgit unun da yan yagit, “Kokup madep Babilon unun kili tuwil kigit. Asi, unun kili tuwil kigit. Kokup madep Babilon amin da yumabi anpakni tebaisi tan yomgut. Ae minjat amin kabi morap miktimon ekwan unun kisi da yumabi anpak ani do tebaisi yoyin dekgwit. Unun awit unun wain morapmi yoba nawit yan yombem agit.”

⁹ Unun anelo bamot da bujon ae kinda da abin gen papmon da yan yagit, “Amin kinda jon kilap yokwisi ae wupni gawak iminek tilakni inamikon ae kisirikon abidosak kan

¹⁰ wain kinda nokdisak. Wain unun Pinjop dakon butjap nan nokdisak. Wain unun pakbisi nan dima anyawot akdisak. Tomni yokwisi yomjak kapmon iyi dakon butjapni tagalban nokdisak. Unun amin Pinjop dakon telagi anelo kabi da inamon, ae Sipsip Monin da inamon tepmi madepsi pakdisak. Tip salfa tepmisi sosok unudon tepmi madepsi pakdisak.

¹¹ Kindap unun sonakwan tepmi panigwan da mukwa mudok mudogi mini pidokdisak. Amin kinda jon kilap yokwisi ae wupni gawak iminek mani dakon tilak abidosok unun amin yik nandat dimasi asak. Gildari gildari ae pilini pilini tepmi pi mudok mudogi mini pakdisak.”

¹² Unun bisapmon Pinjop dakon minjat amin kabi butni yawori tanakwa geni guramikgan, ae Yesu

14:8: Ais 21.9; Jer 51.7-8; PA 17.2; 18.23 **14:9:** PA 13.12-17

14:10: WW 19.24; Kap 75.8; Ais 51.17,22; Jer 25.15-16; Esi 38.22; PA 16.19; 20.10 **14:11:** Ais 34.10 **14:12:** PA 13.10

tebaisi nandan gadan iman amin unun tebaisi atdo.

¹³ Kili nandanapbo Kwen Kokupmon da amin kinda da yan yagit, “Gen yan mandaki, ‘Abisok minat amin kabi Amin Tagi nandan gadan iminek kimokgon ae don kimotni unun kisik kisik tagi ani.’” Ae Telagi Wup da yan si yosok, “Asisi, amin unun oman pi madepsi awit unun yipmanek yik yawot pani. Yan anakwa anpak kilegisi awit unun mandabi da ton unun da yolba kisi kini.”

Miktimon jap morap bami kili pik tawit, unun pakpak dakon bisap noman tak

¹⁴ Unun da kwenon nak gikwem kwakwagi kinda kagim. Unun gikwemon “amin dakon monji yombem kinda” yikban kagim. Busunikon kila amin madep dakon pelit gol ban wasanbi kinda tagit, ae kisitnikon jap bami pakpak siba geni tepmisi kinda abidagit.

¹⁵ Ae anelo kinda Pin kop da Telagi Yut Madepmon da abigi amin unun gikwemon yikgit unun tebaisi yan tidanek yan iyigit, “Sibago abidanek jap bami tan balja. Miktimon jap morap kisi kili pik tan, do abisok jap unun baljoki dakon bisap.”

¹⁶ Yanakwan amin unun gikwemon yikgit unun sibani abidanek miktimon jap pik tawit unun baljagit.

¹⁷ Ae anelo kinda gat Pin kop dakon Telagi Yut Madep Kwen Kokup tosok unun yipmanek wanga pigit. Ununyo kisi jap bami pakpak sibani geni tepmisi kinda abidagit.

18 Ae anjelo kinda alta yipmanjek apgut. Anjelo unjun kindap sosok dakon kila agak dakon tapmim tanj imgut. Unjun da anjelo jap bami pakpak siba geni tepmisi abigit amin gen tebaisi yanjek yan iyigit, “Miktimon wain sop kili pik tanj mudan, do gak sibago geni tepmisi unjun abidanjek miktim dakon wain sop unjun mandanek timi kindakon gin panmuwukgi.”

19 Yanjakwan anjelo sibani abidanjek miktim dakon wain sop mandanek panmuwuk yopgut. Yopmanjek wain sop unjun bamanj til do bamanj til tamo madep kindagwan similgit. Bamanj til tamo madep unjun Pinjkop dakon butjap dakon tilak asak.

20 Unjun wain sop bamanj til tamo madep kokup pap da wanga tagit, wain sop unjudon bamanj tilgwit. Anjakwa unjungwan da yawi madepsi pak abigek miktim kisi witjijnban 300 kilomita da arip agit. Anjakwan yawi winan win os da gen kagakon ain tim tosok unjun da aripmon wigigit.

15

Anjelo 7 kabi da yo yokwisi 7 kabi timikgwit

1 Ae Kwen Kokupmon tilak masi masimi ae tapmimi tonji kinda noman tanjban kagim. Anjelo 7 kabi pindakgim. Unjun da amin panupbal ak do yo yokwisi 7 kabi timikgwit. Yo yokwisi unjun da mudanakwa ae yo kinda dima noman tosak, Pinjkop dakon butjapni wagil mudokdisak.

2 Ae yo kinda tap idap madep yombem kagim. Unjun tap idapmon glas gat kindap gat iktagilbi. Tap idap glas yombem unjun da kidipminjon amin

morapmi akgwit. Uņun amin kabi emaron teban tanek jon kilap yokwisi gat ae wupni gat ae mani dakon nambani abin yipgwit amin. Uņun gita Pin kop da yomgut uņun timikgwit.

³ Anek Pin kop dakon oman amini Moses gat, ae Sipsip Monin gat dakon kap yawit. Kap uņun yan:

“Amin Tagi Pin kop Tapmim Ami,
pi masi masimi tapmimi ton si asal.
Amin kabi morap dakon Kila Amin Madepni,
anpakgo uņun kilegisi ae bamisi.

⁴ Amin Tagi, gak kalon dagin telagisi egisal, do namin da gak do pasalek mango dima yan an kisisak?

Anpakgo kilegisi uņun kili altan noman tawit, do miktim morap dakon amin da abinek gawak gamdan.”

⁵ Uņun da kwenon aeno sintoko Pin kop dakon telagi imal yutni Kwen Kokup tosok uņun witalgwit.

⁶ Anelo 7 kabi uņun amin panupbal ak do yo yokwisi 7 kabi timikgwit, uņun Pin kop dakon yut yipmanek wanga piwit. Uņun imal gwaljigi minisi ten ten ini ton ban pawit. Ae pibirikon imal dak gol ban wasanbi ban pangwasin ek wamgwit.

⁷ Yo 4 kabi egip egipmi ton da kabikon kind a da idap madep gol ban wasanbi 7 kabi anelo 7 kabi do yomgut. Pin kop, dagok dagogi mini egi anan kisak teban, uņun dakon butjapni uņun idap madepmon tujan tawit.

⁸ Ae Pinjkop dakon tilimni gat ae tapmimni gat dakon mukwa Telagi Yut Madepmon tugan tawit. Amin kinda da unjungwan aripmi dima wigisak. Anjelo 7 kabi da yo yokwisi 7 kabi ban pini aba daganjakwa don wigigi.

16

Idap madep 7 kabi Pinjkop dakon butjapni ton unjun tagalgwit

¹ Nandanapbo Pinjkop da Telagi Yut Madepgwan tek madepsi kinda nandagim. Unjun anjelo 7 kabi tebai yan tidanek yan yoyigit, “Ji Pinjkop dakon butjap unjun idap madep 7 kabikon ton unjun pabidan panji miktimon tagalni.”

² Yoyinban anjelo mibiltogi da idap madepni miktimon tagalgit. Yan anakwan wuda teban yokwisi tepmini madepsi mibili mibili amin jon kilap yokwisi dakon tilakni tan yomgwit, ae wupni wasanbi do gawak imgwit, unjun da giptim timon yikgwit.

³ Ae anjelo 2 idap madepni tap idapmon tagalgit. Tagalban tap idap amin kili kimakbi dakon yawi yombem agit. Anakwan tap kagagwan yo morap egip egipmi ton unjun kimakgwit.

⁴ Ae anjelo 3 idap madepni pakbi madep ae pakbi dabil da kwenon tagalgit. Tagalban pakbi morap kisi yawi dagawit.

⁵ Anakwan nandanapbo anjelo pakbi kila agit unjun da yan yagit, “Pinjkop, Telagi Amin, gak abisok egisal, ae kalipsigwan egipgul. Anpakgo wagil

kilegisi, do kokwin kilegisi anek yo yokwisi altan yomni do yagil.

⁶ Unun amin kabi da kombi amingo gat, ae minjat amin kabigo gat dapmanakwa yawini tayinigiwit. Yokwi unun awit do gak da yawi kolej yobi nonj. Yokwi awit dakon kobogi tagi timikganj.”

⁷ Ae nandanapbo altakon da amin kinda da yan tidanek yan yagit, “Amin Tagi Pinjkop Tapmim Ami, gak da amin gen pikon anpakni kokwin an yomisal. Asisi, gen pikon yopyopgo unun wagil bamisi ae kilegisi gin asal.”

⁸ Kili anjelo 4 da idap madepni gildaron tagalgit. Tagalakwan Pinjkop da gildat do tapmim iminjakwan gildat da madep tanek amin sonj yomgut.

⁹ Gildat tepmisi sonjek, amin unun obisi sonj yomgut. Anjakwan Pinjkop ibipgwit. Pinjkop da nandanakwan yo yokwisi unun altan yomgwit, mani but tobil anek mani dima yan anjisiwit.

¹⁰ Kili anjelo 5 da jon kilap yokwisi dakon kila amin madep yityit tamokon idap madepni tagalgit. Tagalakwan amin morap jon kilap yokwisi da kila agit, unun pilin tuk madepsi altan yomgut. Tepmi madepsi nandanek meli injiwit.

¹¹ Tepmi madepsi pawit, ae giptimnikon wuda tawit, unun do nandanek Kwen Kokup dakon Pinjkop ibipgwit. Mani anpak yokwisi awit unun but tobil anek manji yom do dima nandawit.

¹² Ae anjelo 6 da idap madepni pakbi madep Yupretiskon tagalgit. Tagalban pakbi wagilsi

kibidanakwan amin tagi madep gildat da si wisak tetgin da opni do kosit anjnoman agit.

¹³ Ae kon kapbi mengak yombem pindakgim. Kinda unun nugim yokwisi da gen kagakon da wigit, ae kinda unun jon kilap yokwisi da gen kagakon da wigit, ae kinda kombi amin toptopmi da gen kagakon da wigit.

¹⁴ Unun kon yokwisi kabi wasok tapmimi ton mibili mibili awit. Unun miktimi miktimi dakon kila amin madepni do dukwan dukwan kiwit. Unun kin kila amin madep timikba emat amini gat abin muwukba, Pinjop Tapmim Ami da amin gen pikon yopdisak dakon bisap madepmon Pinjop gat emat wam do muwutdan.

¹⁵ “Nandani. Nak tepmisi kabo noknok da tilagon jikon opdisat. Amin kinda dima pagek yik imalni iyi da kapmatjok toni kan, unun amin kisik kisik asak. Nido, unun amin molan molan dima agipjak, anakwan amin da mayagini aripmi dima kokdan.”

¹⁶ Kili kon da kila amin madep gat emat amini gat timik panabin miktim tim kinda Ibru genon da Amegedon yan yon unudon panmuwukgwit.

¹⁷ Kili anelo 7 da idap madepni kundukon tagalgit. Anakwan Pinjop da Telagi Yut Madepgan, kila amin madep yityit tamonikon da amin kinda dakon gen kaga da yan tidanek yan yagit, “Kili unun mudosok.”

¹⁸ Yanjakwan mal da dukwan dukwan kisi yang-wit. Anakwa wuwik madepsi noman tanjakwan kiririn anakwa wudip madepsi agit. Wudip unun

madepsi daman agit. Miktimon amin egi anan oban bisapmon wudip madep unjuden kinda kalip dima noman tagit.

¹⁹ Kili kokup pap Babilon pudan ki timi kapbi awit. Anakwa minjat amin morap dakon kokup pap morap wagil tuwil ki tasik tan mudawit. Pinjop da kokup pap Babilon dakon anpak yokwisi do nandanek, wain kapmon iban nagit. Wain unun Pinjop dakon butjap damani.

²⁰ Wudip daman anakwan miktim tim morap tap binap tawit unun kisisi tap kagagwan pigiwit, ae kabap morap kisisi tuwil ki minisi awit.

²¹ Anakwa ais sikak madepsi mawit. Ais tim kalon kalon mawit dakon jigini unun 50 kilo da arip. Unun ais sikak kundukon da amin da kwenon manek, amin wagilsi dapman pantasik awit. Pinjop da ais sikak unun yipban man obisi panupbal aban unun do Pinjop ibipgwit.

17

Yumabi minjat madep tomni yokwisi timikgit

¹ Unun anjelo 7 kabi idap madep 7 kabi timikgwit kabikon da kinda da abin yan nayigit, “Gak apbi yumabi minjat pakbi madep madep da kapmatjok yikdak, ni tomni yokwi ban timitdisak unun goliko.

² Miktim dakon kila amin madepni unun minjat gat yumabi morapmi awit. Ae miktim amin morapmi kisi minjat unun gat yumabi awit unun but upbal anek pakbi teban noknok amin yombem awit.”

³ Kili Telagi Wup da butnokon pigi madepsi tu-ganakwan anjelo unun da nak anaj miktim amin dima ekwan timon anki nepgut. Unjudon miñat kinda jon kilap yokwisi gami kinda da kwenon yikban kagim. Unun jon kilap yokwisi da kwenon man morapmisi tawit. Unun man morap unun Pinkop do manji gen mibili mibili tawit. Jon kilap yokwisi unun busunni 7 kabi, ae jomi 10 kabi yan busunikon kwawit.

⁴ Miñat unun imal pagit unun gami ae pili yombem ban pagit. Tilimni gol ban wasanbi mibili mibili, ae tilim tip kildani tagisi ban wasanbi, ae kindirin yoman nogi wukwisi ban wasanbi ban pagit. Kisirikon kap gol ban wasanbi kinda nan abidagit. Pinkop da dabilon anpak inan inani agit gat, ae yumabi agit dakon garak gat, unun kisisi unun kapmon tugan tawit.

⁵ Miñat unun inamnikon mani mandawit. Mani unun tilak gen yombem kinda. Mani unun yan: “Kokup Pap Madep Babilon, unun Yumabi Miñat Morap gat, ae Anpak Yokwisi Miktimon Tosok unun dakon Meni.”

⁶ Unun miñat da Pinkop dakon telagi amin kabi, Yesu nandan gadan iminek mani yan tenjenawit amin dapban kimakgwit. Unun miñat kanapbo amin unun dakon yawini nanek but upbal amin yombem agit. Unun kan wiripdagek but morap nandagim.

⁷ Kili anjelo da yan nayigit, “Gak nido wuripdakdal? Miñat jon kilap yokwisi busunni 7 kabi ae jomi 10 kabi unun da kwenon yikban

kwamal, unun bamot dakon mibili pasili tosok, mani nak unun do golikdisak.

⁸ Jon kilap yokwisi kagil, unun kalipsigwan egipgut, mani abisok ae dima egisak. Mani gapma kidagi mini yipmanek kwen wikdisak. Winjek Pin kop da anjakban wagil pasildisak. Miktim amin, Pin kop da miktim dima wasagit bisapmon amin morap egip egip papiakon mani dima mandagit amin kabi, unun da jon kilap yokwisi kanek wuripdatdan. Nido, kalip egipgut, ae abisok dima egisak, ae don noman tokdisak.

⁹ “Amin nandak nandakni tagisi da yo unun do tagi nandaba pisokdisak. Busun 7 kabi unun ilej 7 kabi dakon tilak asak. Ilej 7 kabikon minat unudon yikdak.

¹⁰ Ae busun 7 kabi unun kila amin madep 7 kabi dakon tilak kisi asak. Kila amin madep 5 unun kili kimakgwit, ae kinda abisok egisak, ae kinda don noman tokdisak. Noman tosak bisapmon bisap pisipmisok egipdisak.

¹¹ Jon kilap yokwisi unun kalip egipgut da abisok dima egisak, unun kila amin madep unun 8. Mani kila amin madep 8 unun 7 kabi da kabikon nani. Unun wagil pasildisak.

¹² “Ae jom 10 kabi unun jon kilap yokwisi da kwenon kwawit, unun kila amin madep 10 kabi dakon tilak asak. Unun kila amin madep dima noman tan. Mani jon kilap yokwisi unun gat yan dagok kaloni panek kila amin madep pini unun 1 awa da tilak gin akdan.

13 Kila amin madep unun nandak nandakni kalonji dagin tokdisak. Anjek kila amin pi asak do tapmimni gat ae yan dagokni gat unun jon kilap yokwisi dogin imdan.

14 Yan aba Sipsip Monin gat emat wamdan. Wamanjek Sipsip Monin da wagilsi pabin yopdisak, nido, unun amin tagi morap dakon Amin Tagini, ae kila amin madep morap dakon Kila Amin Madepni. Unun dakon amin kabini unun iyi yan yomgut anjek iyi do manjin yopgut da geni tagisi guramikgan. Unun amin kabi gat Sipsip Monin gat da emaron teban tokdan.”

15 Anjelo da sanbenjek yan nayigit, “Pakbi madep unun kanaki yumabi minat unun da kapmatjok yikban kal, unun amin mibili mibili morap gat, ae giptim mibili mibili gat, ae gen mibili mibili morap gat, ae amin kabi morap egi anan kwan unun dakon tilak asak.

16 Jom 10 kabi unun pindal, unun jom gat ae jon kilap yokwisi gat da unun yumabi minat do nandaba yokwi tok animdan. Unun obisi antasik anjek imalni kisisi wiririkba molan atdisak. Yan anjek giptimni dakon sabamni nanek kindapmon wagil sokdan.

17 Pinjop da iyi kila amin madep 10 kabi unun do nandak nandak yomdisak. Yoban yo morap noman toni do kili nandagit, unun noman tokdan. Unun but kalon anjek kila amin madep tapmim pawit unun tapmim kisi jon kilap yokwisi dogin imdan. Yan anjakwa wigil Pinjop da yo morap altan mudoni do yagit unun altan mudokdan.

18 Minjat unun kal, kokup pap madep unun kila amin madep morap miktimi miktimi egi ananj kwan unun da kilani asak dakon tilak asak.”

18

Babilon kili tasik tagit

¹ Unun da kwenon kanapbo anelo kinda gat Kwen Kokup yipman pigit. Unun man bini ton, ae tilimni tagisi do anek miktim madepsi tenjentagit.

²⁻³ Tebaisi yan tidanek yan yagit, “Miktim morap dakon amin Babilon gat yumabi morapmi awit. Unun dakon waini tebaisi ban yan nawit. Ae miktimi miktimi dakon kila amin madepni gat kisi yumabi unun gat awit. Babilon amin unun yoni morapmi ae yaworisi egek kisik kisik egipgwit, do miktimi miktimi monen ilit pi an amin unun yoni morapmi amin dagawit. Anpak yokwisi unun agit do kokup pap madep Babilon unun kili tasik tak! Unun kili tasik tak! Unun abisok kon da egipni dakon tamo dagak. Kon yokwisi gat, ae minam injani yokwisi mibili mibili gat kisi unudon ekwan.”

⁴ Ae Kwen Kokupgwan da amin kinda da yan yagit, “Minjat amin kabino, ji kokup pap unun yipmanek abigini. Anpak yokwi asak, do unun gat agek yokwi di abam. Ae yokwi agit dakon kobogi timitdisak, do jijo kisi di timikbam.

⁵ Yokwini panabin kakwanakwan Kwen Kokup da tilagon wigigit. Pin kop da yokwi morapni agit unun pakyanji nandan kimokdok.

⁶ Ji unun yumabi minjat da amin do anpak yokwisi nian anyomgut, unun anpak yan gin an imni. Unun da pakbi teban tebaisi kapmon wasagit.

⁷ Unun iyi dakon man awigek yumabi mibili mibili agit. Do yokwi morapmi unun agit, unun da aripmansi tepmi madepsi iminakwa kunam morapmisi tatjak. Unun iyi dakon man awigek yan yosok, 'Nak minjat madep egisat, do minjat madep da yityit tamo madepmon nak unudon yikdat. Nak minjat sakwabat da yan isal dima egisat. Jigi abisok dima altan namni anakwa kunam aripmi dima takgen. Aripmi dimasi.'

⁸ "Yan yosok, do yo yokwisi mibili mibili gildat kalongin altan imdan. Sot yokwisi noman tokdan, ae amin morapmi kunam tatdan, ae jap do madepsi akdan. Anakwa kindap da Babilon sonban pasildisak. Pin kop Amin Tagi, unun tapmimni madepsi, unun da Babilon dakon anpak kili kokwinikgit, do si tasik tosak do yagit.

⁹ "Miktimi miktimi dakon kila amin madep unun gat yumabi awit, ae yaworisi ae kisik kisiksi egipgwit, do kokup pap unun sosak dakon mukwani pidanban koni bisapmon bupmi kunam yo anek but yokwisi anek egipdan.

¹⁰ Kanba tepmi yokwisi unun paban kanek, madepsi pasoldan. Anek dubagikon da agek yan yokdan, 'Bupmi, bupmisi, Babilon gak. Gak madepsi, ae kokup pap tebaisi! Bisap awa kaloni dogin yokwi agil dakon kobogi yo yokwisi kili noman tan gamik!'

11 “Amin da sanbenek yo kabini dima yumdan, do monej ilit ilit amin miktimi miktimi ekwan unun da Babilon do nandanek bupmi kunam yo anek but yokwisi anek egipdan.

12 Yumanj nok dakon yoni unun gol, silwa, ae tip tomni wukwisi, ae kindirinj tomni wukwisi, ae imal kwakwagi tagisi, ae imal gami mibili mibili, ae silka imal, ae kindap kibanj tagisi morap kisi, ae elepan jom banj yo mibili mibili wasawit kisi, ae yo mibili mibili kindap tomni wukwisi banj wasawit gat, ae ain kinda mani bras, ae ain gat, ae tip tilakni mibili mibili yan.

13 Ae yomanj nok dakon yoni diwarj kisi tanj yomgwit, unun sinamon, ae jap pangalak ak yo mibili mibili, ae mukwa kibanj tagisi sogok dakon yo, ae bit nelak kibanj tagisi mibili mibili, ae wain, ae olip dakon nelagi, ae plaua tagisi gat, ae wit. Ae bulmakau, ae sipsip, ae os, ae oskon da amin pawil tamo, ae oman monj kisi. Unun yo morap amin di da sanbenek yumyumi mini.

14 Monej ilit ilit amin unun da yanj yokdan, ‘Yo tagisi morap unun butgo dasi timikgenj yanj nandagil, unun yo morap gak da dubagisikon tonj. Yo tagisi morapgo yumanj nogi wukwisi gat, ae tilimgo tagi tagi morapgo unun kisisi pasil mudanj. Ae sanbenek dima pindatdisal.’

15 “Ae amin monej ilit pi unun yo morap banj awit, anek unun kokup papmon monej morapmisi timikgwit, unun amin da kokup pap unun da tepmi yokwisi pakdisak unun kanek madepsi pasoldanj. Anek dubagisikon da agek kunam bupmiyo anek

but yokwisi egipdan.

¹⁶ Anek yan yokdan, ‘Kokup pap madep, wagil bupmisi! Kalip imal kwakwagi tagisi, ae imal gami mibili mibili ban pagil. Yan anek giptingo gol, ae tip kildani tagisi, ae kindirin yuman nogi wukwisi ban panjilim agil.

¹⁷ Bisap awa kalonji dogin monej morap unun gat ae tilim gat unun wagil tasik tan mudan.’

“Tap wakga pawilgan amin morap gat, ae tap wakgakon da miktin njwanjwarikon kwan amin morap gat, ae tap wakgakon pi an amin morap gat, ae amin morap tap idapmon monej ilit pi an amin, unun kisi Babilon da dubagikon agek

¹⁸ kindap sonj imjak dakon mukwa kanek, yanji yan tidokdan, ‘Kokup pap madepsi oden kinda dimasi tagit.’

¹⁹ Yan yanek miktimon kimbaban timik busunikon maba wugakwa, bupmi kunam yo anek but yokwisi anek egipdan. Yan anek yan tidanek yan yokdan, ‘Kokup pap madep awa, bupmisi! Tap wakga dakon ami morap tap idapmon akwan unun kokup pap dakon monej morapni ban timigek yoni morapmi amin dagawit. Bupmisi! Bisap awa kalonji dogin unun kokup pap wagilsi tasik tosok!’

²⁰ “Kwen Kokup gat, ae Pinjop dakon minjat amin kabi gat, ae yabekbi kabi gat, ae kombi amin kabi gat, ji kisi unun kokup papmon abisok yo noman tosok unun do kisik kisik ani. Pinjop da

uñun kokup pap da jikon anpak yokwi anđamgut uñun kokwinigeke uñun dakon kobogi imisak.”

²¹ Gen uñun yañ mudanəkwən anelo tapmimi toñ kində da tıp madep kində abıdagıt. Tıp uñun wit misinikgan dakon tıp dakon tilak, madepsi. Tıp uñun anənək maban tap kaga pigigit. Maban pigakwan yañ yagıt, “On asat yañ gin uñun kokup pap madep Babilon abıdan tebaisi maba pigikdisak. Maba pigakwan amin da ae sanbenek dima kokdan.

²² Do Babilon gagon gita dakon gen, bo kinam kirin dakon gen, bo kwen, ae sanbenek gak da nagalgwan dimasi yokdan. Ae kisit kilda amin pi mibili mibili an uñun sanbenek gagon dima egıpdan. Ae tıp madep da wit misinikgan dakon wuwigi gagon sanbenek dima tosak.

²³ Ae lam dakon tenjenı ae sanbenek dima tenjenan gamjak. Ae minat eyo anek soñnok an dakon wuwigi gagwan ae sanbenek dima noman tokdan. Kalıp moneñ ilit amingo miktım amin morap da dabilon wukwisi da egıpgwit. Gak amin pankilıt wasok mibili mibili anek miktımi miktımi dakon amin top pankewalgil.”

²⁴ Pinəop da kanban uñun kokup pap da kombi amini dapgut ae minat amin kabini dapgut dakon gulusunı madepsi tan imisak. Ae miktımon minat aminyo uwal da dapba kimakgwit, uñun dakon gulusunı kisi Babilon dogın tosak.

19

Amin da Babilon tasik tagit unun do kisik kisik awit

¹ Ae unun da kwenon, amin morapmi Kwen Kokup egek madepsi yan tidon dakon wuwik yombem nandagim. Yan tidanek yan yawit, “Pinjkop anjisino! Nin dakon Pinjkop unun dagin nin yokwikon ban timigit. Unun man madepni ton ae tapmimni ton.

² Asisi, Pinjkop gen kokwini unun wagil bamisi ae kilegisi gin asak. Yumabi minat madep unun da miktim amin morap gat yumabi anpak anek panupbal agit. Yan agit do Pinjkop da kobogi yokwisi imisak. Minat unun Pinjkop dakon pi monji dapban kimakgwit, do kobogi imisak.”

³ Ae yan tidanek yawit, “Pinjkop anjisino! Kindap da unun kokup pap sogit dakon mukwani dagok dagogi mini wigisak!”

⁴ Kila amin 24 kabi gat, ae yo 4 kabi egip egipmi ton nwakben anek Pinjkop kila amin madep yityit tamonikon yigakwan gawak ingwit. Anek yan yawit, “Unun asi. Pinjkop anjisino!”

⁵ Ae Pinjkop dakon kila amin madep yityit tamokon da amin kindi da yan tidanek yan yagit, “Pinjkop dakon pi monji, Pinjkop do pasalek ekwan amin, ji amin mani mini ae mani ton, ji Pinjkop anjisini!”

Sipsip Monij minat panakwan jap noknok madep awit

⁶ Ae amin morapmisi da yan, gen yanba nandagim. Wuwikni unun pakbi madepsi pokdok unun dakon wuwik yombem. Ae unun kiririn da

yan madepsi yawit. Unun da yan tidanjek yan yawit, “Pinjkop anjksino! Amin Taginin Pinjkop Tapmin Ami kila amin madep egek pini asak.

⁷ Kili Sipsip Monij da minjat pakdisak dakon bisap kili noman tosok, ae minjat iyi kili tagap tak da egisak, do butnin tagisi anjakra kisik kisik madepsi anjek mani yan anjksinej.

⁸ Pinjkop da imal kwakwagisi tagisi, tenjenini madepsi, ae gwaljigi mini unun minjat do imgut.” (Unun imal kwakwagisi ae tagisi unun Pinjkop dakon amin da anpak kilegisi awit dakon tilak asak.)

⁹ Ae anjelo da yan nayigit, “Gen yan mandaki: ‘Amin unun Pinjkop da Sipsip Monij da minjat pakdisak da sojnok madepmon kini do yan yomisak unun amin kisik kisik tagi ani.’” Ae sanjenek yan nayigit, “Gen on Pinjkop dakon gen bamisi.”

¹⁰ Kili nak anjelo dakon kandap da kapmatjok njwakben anjek gawak im do agim. Mani yan nayigit, “Yan dima abi! Gak gat ae not kabigo gat da Yesu da gen yan tenjenagit unun nandan gadan amin kabi, ji da Pinjkop oman anjiman, unuden gin nak kisi oman amini gin, do Pinjkop nan gawak ibi. Nin nandaman, Yesu Kristo da gen yan tenjenagit, unun dagin amin panjtagap aban kombi gen yonj.”

Jon da amin kinda os kwakwagikon yikban kagit

¹¹ Nak kanapbo Kwen Kokup witdal kigit. Anjawan os kwakwagi kinda akban kagim. Unun oskon amin kinda yikgit, mani unun yan: Pini

Do Butdasi Nandanek Anegisak Amin, ae Anpak Bamisi Asak Amin. Gen kokwin pi asak, ae emat asak, unun anpakni kilegisi nanj yolek asak.

¹² Dabilni unun kindap dakon milen asip yombem, ae busunikon kila amin madep dakon pelit morapmi tanj imgwit. Giptimikon man kindamandawit. Iyi gin kalon da man unun nandisak, amin diwari dima nandan.

¹³ Imal dubak pagit unun yawi madepsikon anhim abi nanj pagit. Mani unun Pinjkop Dakon Gen.

¹⁴ Kwen Kokup dakon emat amin unun osni kwakwagi unudon yigek yol ananj kiwit. Imal kwakwagisi gwaljigi minisi banj pawit.

¹⁵ Emat agak siba geni tepmisi kindam, gen kaganigwan da wigit. Unun emat agak siba nanj amin kabi morap miktimi miktimi egi ananj kwanj unun pabinj yopdisak.

“Ain kirinj nanj abidanek amin kabi morap kilani tebaisi akdisak.”

Yanj anek wain sop pinjtil tip gapmakon wain sop bamanj tildisak. Unun Pinjkop Tapmim Ami dakon butjapni dakon tilak asak.

¹⁶ Imal dubaknikon, ae sunjlikon man yanj mandabi: “Kila Amin Madep Dakon Kila Amin Madepni, ae Amin Tagi Dakon Amin Tagini.”

¹⁷ Ae gildaron anjelo kindam akban kagim. Unun da minam kwen binap akwanj do yanj tidanek yanj yoyigit, “Ji Pinjkop dakon jap noknok madep do abinj muwutni.

19:12: Dan 10.6; PA 1.14; 2.17

19:13: Ais 63.1-3; Jn 1.1,14

19:15: Kap 2.9; PA 1.16; 14.20

19:16: PA 17.14

19:17: Esi

39.17-20

18 Añek kila amin madep dakon giptim timni noni, ae emat amin dakon mibiltok amini dakon giptim timni noni, ae amin tebai dakon giptim tim, ae os gat ae amin os kwenon yikgan amin dakon giptim tim, ae amin morap kisi dakon giptim timni noni: oman dima ekwan amin, ae oman amin, ae amin mani mini, ae amin mani ton kisi dakon giptim tim noni.”

19 Ae jon kilap yokwisi gat, ae miktimi miktimi dakon kila amin madepni gat ae emat amini gat da abin muwukgwit. Unun amin unun oskon yikgit gat ae emat amini gat emat wam do anek muwukgwit.

20 Mani jon kilap yokwisi unun gat ae kombi amin toptopmi gat timikgwit. Kombi amin toptopmi unun jon kilap yokwisi da dabilon wasok tapmimi ton morapmi anek amin pankewalban tilakni abidawit, ae wupni wasanbi do gawak imgwit. Jon kilap yokwisi gat kombi amin toptopmi gat dima kimagek egakwal gapma madep tip salfa unungwan tugawit da sosok unungwan maba pigigimal.

21 Anakwa amin unun oskon yikgit, unun da emat agak siba gen kaganikon tagit unun nan jon kilap yokwisi dakon emat amini kisi morap dapban kimakgwit. Anakwan minam morap da unun emat amin dakon giptimni nanek buri tugawit.

20

Sunduk bilak 1 tausen yan dam tebanon egipgut

¹ Kili kanapbo anelo kinda Kwen Kokup yipman pigit. Kisirikon gapma kidagi mini dakon yoma

witdal abidagit, ae nap teban madepsi kinda kisi abidagit.

² Uñun da nugim yokwisi madep kalipsigwan egipgut uñun abidagit. Mani kinda Koñ, ae mani kinda Sunduk yañ yon. Añelo da nap teban nañ wamañ anteban aban bilak 1 tausen egipgut.

³ Kili añelo da maban gapma kidagi minikon pigigit. Pigakwan gapma uñun dakon yoma sopmanek tebaisi anteban agit. Miktim amin morap aripmi dima panjawajak, yañ do agit. Uñun bilak 1 tausen mudajakwan don yipman dekba bisap pisipmisok galaktoknikon egipdisak.

⁴ Ae kila amin madep yityit tamo pindakgim. Uñun tamokon amin unjudon yikgwit. Pin kop da gen kokwin ani do yañ mudan yomgut. Ae amin uwal da tegi mandan daganek dapba kimakgwit, uñun dakon wupni pindakgim. Kalip uñun amin da Pin kop dakon gen tebaisi abidanek, Yesu do yañ tentenok anakwa uwal da dapba kimakgwit. Uñun amin jon kilap yokwisi gat ae wupni wasanbi gat do dima gawak ingwit, ae uñun dakon tilakni injamnikon ae kisitnikon dima timikgwit. Uñun amin egip egip aeni abidanek Kristo gat kila amin madep egakwa bilak 1 tausen agit.

⁵ Uñun wasok wasok amin kimoron da pidon amin. (Amin diwari kimakgwit uñun bisapmon egip egip dima abidawit. Uñun bilak 1 tausen mudajakwan don egip egip abidokdan.)

⁶ Amin uñun wasok wasoksi aeni pidoni amin uñun kisik kisik tagi ani. Pin kop da uñun amin iyi do manjigit, do kosiri kinda gat aripmi dima

kimotdan. Unun Pinjkop ae Kristo dakon mukwa sogok amin egek Kristo gat bilak 1 tausen kila amin madep egipdan.

Sunduk tasik tagit

⁷ Bilak 1 tausen unun mudanakwan, gapma kidagi mini dakon yoma witalakwa Sunduk dam tebani yipman abigikdisak.

⁸ Unun wanja abigek minjat aminyo miktimi miktimi ekwan unun panjewardisak. Unun amin kabi mani Gok ae Megok yan yon. Sunduk da emat ani do panmuwutdisak. Emat amin kabini dakon tilakni unun tap kidipminjon niman ton yombem morapmisi.

⁹ Unun miktimi miktimi da apgwit. Abin Pinjkop dakon minjat amin kabi gat ae kokup pap Pinjkop da si galak tan imisak unun gat angwasiwit. Mani Kwen Kokup da kindap da pinj emat amin unun son yoban mini awit.

¹⁰ Sunduk da amin panjewaigit, do Pinjkop da Sunduk maban gapma madep tip salfa tepmisi sosen unudon pigigit. Jon kilap yokwisi gat ae kombi amin toptopmi gat unun bamot unun gapmakon kili egipgumal. Unun amin kapbi kalbi ae gildari tepmi madepsi bisap mudok mudogi mini panjegipdan teban.

Gen pi madepsi noman tagit

¹¹ Unun da kwenon kila amin madep yityit tamo madep kwakwagi kindan tanban kagim. Ae unun tamokon amin kindan yikban kagim. Anakwan miktim

gat ae kundu gat yipman dek kigimal. Ae sanbenek dima tagimal.

¹² Amin kimakbi pindakgim. Unun amin mani ton, ae mani mini, unun kila amin madep yityit tamokon noman akgwit. Kili anelo da papia di kwini kwit. Ae papia kinda kisi kwini kwit, unun egip egip dakon papia. Anjakwan Pin kop da unun papiakon gen tawit unun pindagek amin kimakgwit unun dakon anjak kalip awit unun kokwin agit.

¹³ Ae amin kalip tap idap gwan kimakgwit unun kisi Pin kopmon kwa anjak morap kalip awit unun kokwin agit. Ae kimot gat ae Amin Kimakba Yopbi Tamo unun bamot yum pindagakwal amin kimakgwit unun Pin kopmon kwa amin kalon kalon da anjak kalip awit unun pindagek kokwin agit.

¹⁴ Kili kimot gat ae Amin Kimakba Yopbi Tamo unun maban pakbi idap kindap sosok unudon pigigimal. Pakbi idap unun kindap sosok unun amin kosiri kinda gat kimokgon dakon tamoni.

¹⁵ Amin morap mani egip egip papiakon dima ton unun kisi maba pakbi idap kindap sosok unudon pigiwit.

Pin kop da yo morap pan kaluk akdisak

(Kilapmi 21-22)

21

Kundu kalugi gat ae miktim kalugi gat pindakgim

¹ Unun da kwenon nak kundu kalugi gat ae

20:12: Dan 7.9-10; Mt 25.31-46; Ya 17.31; 2Ko 5.10; PA 13.8

20:13: Ro 2.6; 1Pi 1.17; PA 2.23; 22.12 **21:1:** Ais 65.17; 2Pi 3.13

miktım kalugi gat pındakgım. Kundu mibiltogi gat miktım mibiltogi gat unun kılı wagıl kiñ pasılğimal. Ae tap idap sanbenek dima tagit.

² Ae Piñkop dakon telagi kokup pap unun kagım. Unun Jerusalem kalugi. Unun koko Piñkop gat egıpgumal, da Kwen Kokup yıpman dek pigıt. Unun tilimni tagisi, miñat da amin pak do tagap tanek tilimni tagisi pasak unuden.

³ Ae kila amin madep yityit tamokon da amin tek kinda madepsi yan tidanban nandagım, “Nandani. Abısok Piñkop dakon yut amin da binapmon tanakwan iyi dakon miñat amin kabini egıpnı. Asi, Piñkop iyi unun gat egıpdan. Anek unun dakon Piñkopni egıpdısak.

⁴ Unun kabikon kunam pakbi morap dabilikon toni unun kisisi wiririkban kunam sanbenek dima tatdan. Ae amin sanbenek dima kimotdan, ae but yokwi anek sanbenek kunam dima tatdan, ae tepmi sanbenek dima pakdan. Nido miktım kalıpmı gat yoni kalıpmı gat unun kisisi pasıl mudokdan.”

⁵ Amin unun kila amin madep yityit tamokon yikgit, unun da yan yagit, “Nandani, yo morap abo kalugi an mudon.” Aeni sanbenek yan yagit, “Gen on mandaki. Nido gen gayısat unun bamisi. Amin morap kisi da unun do tagi nandan gadagi.”

⁶ Yanek yan nayigit, “Pi unun mudosok. Nak Wasok Wasoksi ae Mibisi egısat. Pi morap asat unun wasıp anan asat. Amin kinda tegi bap tosak kan, nak da yıpbı pakbi dabil egıp egıpmı ton ae

21:2: Ais 52.1; 61.10; İbr 11.16; 12.22; PA 3.12 **21:3:** MS 26.11-12; Esi 37.27; Sek 2.10; 2Ko 6.16 **21:4:** Ais 35.10; 65.19; PA 7.17
21:5: 2Ko 5.17 **21:6:** Ais 55.1; Jer 2.13; Jn 7.37; PA 1.8,17; 22.17

yumanj nogi mini unjun nosak.

⁷ Amin kinda emaron teban tosak kanj, nak da unjun yo morap ibenj. Anek nak da Pinjkopni egapbo unjun da monjino egipjak.

⁸ Mani amin pasalek duwalik pukwanj, ae nandanj gadat dima anj, ae anjak yokwisi morapmi anj, ae amin dapba kimokgonj amin, ae amin yumabi anj, ae sot mawomyo anek yo tapmimi ton pawilganj amin, ae kokup kidat do gawak yomanj amin, ae amin morap top yonj, unjun iyi da kokupmon pigikdanj. Unjun pakbi idap kindap tepmini madepsi salfa tip da sosoj unjun. Unjun amin kimot kosiri kinda gat anj unjun dakon tamoni.”

Jon da Jerusalem kalugi kagit

⁹ Kili anjelo kinda nagon apgut. Anjelo unjun anjelo 7 kabi idap madepmon Pinjkop dakon butjap mudosak do amin panjupbal ak dakon yo yokwisi 7 kabi timikgwit unjun kabikon nani kinda. Anjelo yanj nayigit, “Gak apbi Sipsip Moninj dakon minjatni abisok pakdisak unjun goliko.”

¹⁰ Kili Telagi Wup da butnokon pigi madepsi tujanjakwan anjelo unjun da nak bedan anki ilen madepsi ae kwensi kinda unjudon nepgut. Anki nepmanjek Pinjkop dakon kokup pap Jerusalem noligit. Unjun koko Pinjkop gat egipgumal, da Kwen Kokup yipmanj dek pinban kagim.

¹¹ Pinjkop dakon tilimi madepni unjun kokup papmon tenjenagit. Tenjenini unjun njwakjwarisi, tip yumanj nogi wukwisi dakon tenjenini yombem.

Uñun tip jaspera yombem da yan tenjenagit. Uñun glas yombem gwaljigi minisi.

¹² Kokup pap yoma nagalni uñun kwensi. Uñun yoma kagani 12 kabi, ae anelo 12 kabi uñun yoma kagakon akgan. Anakwa Israel amin kabi 12 dakon man yoma domon tawit.

¹³ Nagal uñun dakon diwari gildat da wisak tetgin do yoma kagani kapbi tawit. Ae not tetgin nani do yoma kagani kapbi tawit. Ae saut tetgin nani do yoma kagani kapbi tawit. Ae nagal uñun dakon diwari gildat da pigisak tetgin nani do yoma kagani kapbi kisi.

¹⁴ Kokup pap uñun dakon nagal tebaisi tosak do kwiniri tip daman 12 kabi mibilikon tawit. Sipsip Monin dakon yabekbi 12 kabi dakon mani uñun tipmon tawit.

¹⁵ Anelo gen nayigit uñun da kalin kirin gol ban wasanbi kindaa abidagit. Uñun nan kokup pap gat, ae nagal madepni uñun gat, ae nagal uñun dakon yoma kagani tilak yop do abidagit.

¹⁶ Kokup pap dakon ilenji 4 kabi dakon tilakni uñun kalonji gin. Dubagini ae madepni uñun kisi aripginsi. Anelo da kokup pap kalin kirinji nan tilak yipban 2,200 kilomita da arip agit. Kokup pap dakon ilenji 4 kabi dakon tilakni gat, ae kokup pap dakon kwen nani kisi dakon tilakni uñun aripginsi.

¹⁷ Ae kokup pap dakon nagal kisi tilak yipgut. Yan aban nagal kwen wigigit dakon tilakni 65 mita da arip agit. Tilak yopyop uñun amin da tilak yopmanjan uñun nanjin anelo da nagal dakon tilak yopgut.

18 Kokup pap dakon nagal unun tip jasper ban wasanbi. Anek kokup pap unun gol jimjimi minisi ban wasanbi. Kokup pap unun dakon gol unun glas yombem gwaljigi minisi.

19 Kokup pap dakon nagal dakon teban tokni unun Pinjok da tip yuman nogi wukwisi mibili mibili unun ban panjilim agit. Tip 1 tagisi nagal mibilon tagit unun tip jasper. Ae tip 2 unun tip pili unun tip sapaia. Ae tip 3 unun tip aget. Ae tip 4 unun kalikaligi, unun tip emeral.

20 Ae tip 5 unun tip sadonikis, unun gami kwakwagi kisi. Tip 6 unun tip giman konilian. Ae tip 7 unun kilonkiloni, unun krisolait. Ae tip 8 unun tip kalikaligi njaknjari kinda unun beril. Ae tip 9 unun tip kilonkiloni njaknjari kinda unun topas. Ae tip 10 unun tip krisopres. Tip 11 unun tip aiasin. Ae tip 12 unun tip gami njaknjari kinda tip ametis.

21 Yoma kaga 12 kabi unun pel 12 kabi, unun kindirin yuman nogi wukwisi. Yoma kalon kalon pel madep kalon kalon ban wasanbi. Kokup dakon kosit pap unun gol bangin wasanbi. Gol unun gwaljigi minisi glas yombem.

22 Unun kokup papmon Telagi Yut Madep kinda dima tanban kagim. Nido, Amin Tagi Pinjok Tapmin Ami gat ae Sipsip Monin gat da iyi Telagi Yut Madep da yan egipgumal.

23 Unun kokup papmon gildat gat kanek gat pini mini. Nido, Pinjok dakon tilimni da kokup pap tentenan imisak. Anakwan Sipsip Monin unun kokup pap dakon lamni da yan egisak.

24 Amin miktimi miktimi egi anan kwan da unun

kokup pap dakon tenjenikon agipdan. Anakwa miktimi miktimi dakon kila amin madep da yoni tagi unun yuman nogi wukwisi unudon panopdan.

²⁵ Unun kokup papmon pilin kinda dima tokdisak, do kokup pap dakon nagal dakon yoma dagok dagogi mini pisokdan.

²⁶ Amin miktimi miktimi egi anan kwan unun yoni tilimi tagisi ton gat ae man madep imim anpakni kisi timigek unudon panopdan.

²⁷ Mani pilin tuk dakon yo gat, ae amin anpak yokwi mibili mibili an gat, ae top yon amin unun kokup papmon dima pigini. Minat aminyo Sipsip Monin dakon egip egip papiakon mani ton, unun dagin unun kokup papmon pigikdan.

22

Jon da egip egip pakbi gat ae egip egip kindap gat pindakgit

¹ Kili anelo unun da pakbi madep kinda noligit. Unun egip egip yomyom pakbi. Unun glas yombem gwaljigi minisi agit. Pakbi unun Pin kop gat ae Sipsip Monin gat da kila amin madep yit yit tamogwan da pak abigisak.

² Pak abigi kokup pap da kosit madep da binapsi nan pak kisak. Pakbi da ilenji teri teri egip egip yomyom kindap akdak. Kindap unun bilak kinda da butgwan bami pot do kosiri 12 yan an asak. Kanek morap kisi bami tan tan asak. Ae kindap unun dakon tami unun amin miktimi miktimi egi anan kwan unun sotni panmilip ak do ton.

³ Yo morap jobit pabi unun yo morap sanbenek ae dima tokdan. Pin kop gat ae Sipsip Moni gat dakon kila amin madep yityit tamo unun kokup papmon tosak. Ae Pin kop dakon oman amin da gawak imdan.

⁴ Gawak iminek tomno dabilni kokdan, ae Pin kop dakon mani oman amini da inamnikon tokdisak.

⁵ Pilin ae sanbenek dima tokdisak. Anakwan lam gat ae gildat gat pini mini, nido Amin Tagi Pin kop da iyi minat amin tentenan yomdisak. Anakwan oman monjini kila amin madep dagok dagogi mini egi wigikdan.

⁶ Anelo unun da yan nayigit, “Gen unun bamisi. Amin morap kisi da unun do tagi nandan gadagi. Pin kop Amin Tagi da kombi amin dakon wup pan tagap aban geni yan tentenan. Unun aneloni yabekban abin yo tepmisi noman togi unun oman monjini nin noligit.”

Yesu apdisak

⁷ Yesu da yosok, “Nandani! Nak kili ununjok apdisat. Minat aminyo kombi gen on papiakon ton unun guramikgan, unun kisik kisik ani.”

⁸ Nak Jon da gen on nandanek yo unun pindakim. Yo unun nandan pindakyo an mudanek anelo unun yo morap noligit unun da kandap mibilon n wakben anek gawak im do agim.

⁹ Mani yan nayigit, “Yan dima abi! Nak kisi oman amin gin. Nak gak gat ae kombi amin kabi notgoni unun dakon pi isalji, ae amin morap on papiakon

22:4: Mt 5.8; PA 3.12 **22:5:** Dan 7.18,27; PA 5.10; 20.6; 21.23,25

22:6: PA 1.1 **22:7:** PA 1.3 **22:8:** PA 19.10

gen ton unun guramikgan amin unun dakon pi isalni. Pinjop kalon nanjin gawak ibi.”

¹⁰ Yan nayinek sigin yan yagit, “Kombi gen on pa-piakon ton unun dima sopman anteban abi. Nido, Pinjop da yo morap unun akdisak dakon bisap kili kwan tak.

¹¹ Amin anpak yokwi an, unun yum pindagakwa sanjenek ani. Ae amin anpak injan inani an, unun yum pindagakwa sanjenek ani. Ae amin anpak kilegisi an, unun yum pindagakwa sanjenek ani. Ae amin telagi ekwan, unun yum pindagakwa telagi sigin egipni.”

¹² Yesu da yan yagit, “Nandani, nak tepmisi apdisat. Minat amin morap tomni yom do apdisat. Anpak awit dakon kobogi do tomni anpak awit da aripmon yomdisat.

¹³ Nak Wasok Wasoksi ae Mibisi egisat. Nak mibiltok egisat, ae bunjonsi egisat. Nak yo morap dakon mibili. Pi morap asat unun wasip an an asat.”

¹⁴ Amin pabi pigik dubakni sugon unun kisik kisik tagi ani. Unun da egip egip yomyom kindap dakon bami tagi pan noni, ae unun da kokup pap da yoma kaga nan tagi pigini.

¹⁵ Anakwa amin anpak yokwisi an amin gat, ae amin sot wamwam anek yo tapmimi ton pawilgan amin gat, ae yumabi an amin gat, ae amin dapba kimokgon amin gat, ae kokup kidat gawak iman amin gat, ae amin anpak toptopmi do galak tanek yolgan, unun amin morap Pinjop dakon kokup pap da wanja egipdan.

16 “Nak Yesu, nak da anelono yabekgo jikon obik da panmuwukbi jikon gen on yan tenjenosok. Nak kila amin madep Dewit da babi kabikon da gugit wugit unun nak mani. Ae nak Dewit Dakon Monji, ae nak Wisawisa Dakon Gik Pap Madepsi Tenjenosok unun.”

17 Telagi Wup gat ae minat unun Sipsip Monin pakdisak gat da yan yomal, “Gak apbi.” Ae amin morap gen on nandani ji kisi yan yoni, “Gak apbi.”

Amin kinda tegi bap tosak kan tagi apjak. Amin kinda pakbi nok do nandisak kan, unun amin abinek egip egip yomyom pakbi tagi nosak. Unun Pin kop da but galak do yumsi nimisak.

Jon da gen on papiakon ton unun nandani amin do gen tebaisi yipgut

18 Nak da on papiakon kombi gen ton unun nandani amin morap do gen tebai yipmandat. On gen tosogon amin kinda gen kinda gat sanbesak kan, amin panupbal ak yo yokwisi on papiakon ton, unun Pin kop da sanbenban unun aminon noman tan imdan.

19 Ae amin kinda da kombi gen on papiakon ton di wiriritjak kan, Pin kop da yo tagisi on papiakon ton unun wiririk imjak. Anakwan unun amin egip egip yomyom kindapmon jap dima pan nosak, ae Pin kop da telagi kokup papmon unudon dima egipjak. On papiakon unun dakon geni ton.

20 On yo morap do yan tenjenok asak amin da abisok yan yosok, “Asisi, nak kilisok unun apdisat.” Asi, Amin Tagi Yesu gak apbi.

²¹ Amin Tagi Yesu dakon nandanŕ yawotni unun
Piŕkop dakon miŕjat amin kabikon tosak.

PIN^KOP GEN
The New Testament and Psalms in the Yopno Language
of Papua New Guinea
Nupela Testamen na Buk Song long tokples Yopno long
Niugini

copyright © 2010 Wycliffe Bible Translators, Inc.

Language: Yopno

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-01-09

PDF generated using Haiola and XeLaTeX on 28 Dec 2024 from source files dated 31 Aug 2023

b683ce50-d820-5bfc-8471-d8ee080be106